





空明先生餘集序

曩者乙亥之夏先君子賁園先生自罷城歸

妻爲祿稱

道先生之詩且出先生詩一編以示時先生年猶未強

仕而其詩已超然絕出卓者山立肆者濤洶卓詭汗瀾

不專一能至於樂府之作或假物託諷或據事直指深

厚剴切各臻其妙實兼樂天微之兩家之長至放而爲

瑰偉奇怪之詞以抒其曠達豪橫之氣則尤飄飄然有

謫仙人乘雲馭風出六合而絕埃塵之態宜先君子甚

愛其詩而每舉以發皇後起學詩者之心目而解釋其

拘攣也常欲爲之論次以傳而衰年多病卒未及爲道

乙未秋先生之初集始出而先君子已不及見矣其後



五年之間先生之續集後集繼出遠近學者爭購之今年春先生命其令子延年執經於予因得朝夕相從既聆其緒論并悉其生平持躬淑世之詳深恨親炙之晚而先生亦忘其年德謬欲引爲紀羣之交且謂其粗知文字源流因以所著餘集俾爲之序竊惟先生厚意既不可虛辱而先君子平日慕好先生之心欲託之言而未果與祿今日所得竊窺於先生者皆不空默默而已遂不敢以不文爲辭夫古人之以詩傳者多矣然工於詩者未必兼工於文卽兼工於文矣而其體之於身措之於事者未必其能本末一致也豈非攻其偏者易至而攬其全者難能託之空言者易售而見於實用者難

強與夫不能見於實用而僅託之空言文雖工非文之至者也不能攬乎其全而僅詣乎其偏詩雖工非詩之至者也然執此以論今人之詩其能滿人意者固亦僅矣若先生之詩而豈有是哉先生自幼穎悟嗜學而稟素清羸遂病咯血後遇異人授以內養之術治心養氣冥合造化沉疴旣捐內照斯發窮幽極渺洞照靡遺於是徧考之十三經旁証之念一史而又以其從事帖括餘閒博觀秦漢唐宋以下諸家文集其於民彛物則之要處事應變之宜人情之講張巧幻文章之升降正變無不有以洞其微而通其變故其持躬淑世一本其胷中所素定者以從事而恒覺其整以暇未弱冠爲諸生



已有文數千首傳誦於時其他議論之文皆明目張膽  
是是非非務必伸其理之所是往往反覆馳騁不能自  
休如集中所載爭論諸篇是也至應人請乞而爲傳誌  
碑銘之文則翦截有法往往他人一二千言不能了者  
先生恒以數百言了之而文核事該舉無遺漏洵有得  
於司馬氏之潔者非如近代專門名家僅以詩鳴而已  
也其爲諸生時才名藉甚人謂其必繼少宰公而起而  
數踏舉場竟不一售辛酉之役則旣得而復失之其後  
諸季羣從相繼登第剖符竹列侍從及需次里居者至  
六七人而先生僅以歲薦選得崇明之司訓崇明僻在  
海外其俗素輕士尹其地者往往齊民視諸生先生旣

至卽正言規切之且以廉耻厲諸生由是士氣稍振而  
士習亦爲之一變其課文武諸生童飲食教誨勤勤懇  
懇一出於中心之誠又搜訪邑之貞婦孝子及士之以  
一行著者多至二百餘人皆給匾捐俸詣門肅拜以旌  
之又爲之立傳附于集中以傳至邑人有所不便者先  
生必力爲當事言而去之以故其邑士民皆依先生若  
慈母而宦其地如大總戎陳公監司魏公以下皆隆先  
生以殊禮陳公尤慕好先生形于篇咏不一而足而大  
中丞吳公亦曾有以實心行實政之褒談及時事多所  
採納已而與上官論事不合先生據理申辨挺挺不阿  
同列皆相顧駭愕謂其且得罪而上官雅重先生爲人



顧好言以謝之先生自以不能與時俯仰未幾竟移疾歸里諸公既挽留先生不能得則相率而祖其行而士民亦空巷陌出送至幾萬人蓋自有崇邑以來去官之華未有盛於先生者也夫先生之官一司訓耳且蒞崇日淺而其教施膏澤之浹人者已如是使得膺廣土衆民之寄而假以歲月則其及人者宜如何耶又使其居古大司徒教官之職以三物六行興起斯民則其所薰陶成就者又當如何耶故識者雖以先生晚年一出覘其政事之長而又以天限之以一第使不得大展其用爲可惜也歸里以後惟以杜門課子爲事雖羸邑大夫交式廬致敬而先生益循分引退平居敦倫紀篤風義

瞻宗族撫孤遺葶親友助嫁娶一引爲分內事行之者數十年曾無倦色尤好獎後進爲所賞識者率成名士年來自以血氣漸耗三集斷手後卽堅持作詩之戒雖四方之以詩投贈者麀至而先生皆不暇答也今季仲夏興會偶觸因取而按年和之間雜以懷人咏物之作凡四五日間人事無廢而已得詩二百六七十篇因名之曰餘集分爲八卷先付諸梓而虛其左方以俟他日之以類附焉皆卽事攄情而意無不達隨物肖形而神與俱傳其自然入妙如風水相遭而波瀾自生變化生動如雲霞卷舒而態狀靡定雖格律氣韻與前此三集不異然絢爛極而造乎平淡鉛華洗而益露天真則後



來者尤有積薪之嘆矣然在先生則詩特其文章之一體而文特其行已爲政之緒餘故觀先生諸集者當知其獨立乎昭曠之原而高視乎萬物之表故其積之有本而出之不匱如是而毋徒驚其才氣之浩瀚言語之工妙則庶幾有以得乎斯集命名之意矣

雍正元年中元前二日梅原晚生沈元祿雲子氏拜手序

張景桓先生空明子集題辭

余讀空明子詩文雜著憮然興嘆曰天之生才殆非偶然曷以空明子之雄偉奇特超絕時流而不使之振英詞館擁節方州僅僅以明經司教歸老丘園使其輪困結轆胸中之奇無所發洩徃徃旁見側出於筆瀾墨藎光怪變現不可方物莊語名言雜諸詼笑天之生斯才也如是焉而已耶然夷考古人又未嘗不掩卷而歎也何則才人命奇天實使之歷觀前哲其所遇之困抑無聊顛躓折辱較之空明殆有甚焉者指不勝屈若空明之家門鼎盛丘壑自娛優游文史流連景光以視汨沒宦海崎嶇羊腸進退路殊險易情別俛仰曩今未爲不



幸已而且晚年毓秀未滿七齡頭角嶄露大書雜誦儀  
度端凝余於今年之春一見驚異稱爲睚童天之篤於  
空明夫豈俗情睫論所可測知者哉康熙六十年辛丑  
閏六月立秋日青浦王原拜書

讀空明集題辭

立言可以不朽文辭云乎哉蓋必有其實矣若屈子之  
忠摯而後有離騷蒙莊之曠達而後有南華左氏之博  
洽子長之負氣而後有左國有史記有其實而發爲文  
章夫然後可以往古來今極天蟠地以垂不朽徒飾虛  
車人弗庸已此楊子雲甲辭賦以雕蟲韓退之醜宏詞  
于俳優也吾輩空明先生者究心理學旁通子史生平  
以風節自厲和易近人之中能卓然獨行其是不爲強  
力者少屈柔不茹而剛不吐其性固然雖當蘊玉嵌珠  
不克聞達之日而其胸中自有傲睨千古之概橫絕四  
海之氣其人固不世出之人也亦奚待以文重哉然充



實於中則標彩揚英怪怪奇奇涵涵汨汨卒有不能掩  
匿者辛丑之秋先生以全集及近著示余余正襟危坐  
誦一再過祇覺美不勝賞如遊疏圃草木都非人間如  
入鮫宮球琳莫能名狀其以才藻勝者如彛鼎之陳几  
席精彩動人燦然奪目其以醇雅勝者如芝蘭之在庭  
除悠然靜對心曠神怡而其妍音協韻之作亦復無體  
不備遠不戾乎風雅之遺近不違乎漢唐之則文豪詩  
聖先生殆以一人兼之要皆根柢於性情而發皇於翰  
墨者其忠摯如屈子曠達如蒙莊博洽而負氣又皆如  
左如史而後有是集也人以文重乎文以人重乎審是  
而知立言果可不朽矣 年家晚生徐翊欽拜譔

空明子詩集目錄

卷一四言古詩

我生篇三十二章

有鳥三章

六章

贈邑侯劉公七章

述兆熊命名取字之由

挽蔣錫安先生三章

卷二五言古詩

贈焦廣期

贈馮方山

述懷

贈顧湘九

將有武林之行

贈華邑周父母

答贈陸叙伯

延恩院訪慎微上人

答贈述堂郭師臺原韻

題陳檢亭三蕉書屋用



東坡西齋韻

舟中風雨

十五夜望月

題趙价人先生東籬詩

夜坐

女蘿嘆

歸帆

自幸篇

七十誕辰示延年

聞三韓張祖臺 特簡

雲間郡侯之命志喜

贈婁父母蕭公

卷三七言古詩

雲間太守行為郡侯周祖臺賦

自題崇川歸里圖

寄大總戎陳公

懷大叅魏公

憶副總戎冉公

贈姚藥巖

將進酒為王虛亭賦

輓俞楠亭

苦熱行

和王雲山贈兆熊原韻

贈朱國士

答贈馮龍孫

題思兼勝生令祖省廬

先生遺照

題勝希周父子行樂圖

放歌行

戴景南命畫工寫三照

左右僧道裝束作此題之

包山歌

題兆熊小言集

捉虎行

懷古

時雨歌

雍正四年六月六日歌

洋繡球花為庶常六雅儲先生賦

行行曲

橫雲山小赤壁歌



澗山感

典房嘆

斲山吟

閱潛人陳先生臥佛詩

有作

買山引

箕山咏

挽範之王先生及二子

偕亡歌

薛澱觀漁謠

藏金蓮歌

酬崇明張父母歌

東城曲為春坊志山王先生賦

卷四五言絕句

菰蘭

釀酒

竒鬼

草木嘆

惡木

癩丐

好客

攜杖

隱士

望月

靈椿

孤行

交道

曉寒

春山

老榦

晚照

古栢

望洋

夜窗

訪隱

幽居

性惡

僅見

守恒

樹德

結契

手談



除惡

樂天

醉人

怪壞

永晝

坐隱

晚眺

曉窗

品茶

日本茶花

聞鶯

夜景

西園

登赤壁

新柳

即景

叅道

柳絮

曉鶯

渡湖

把釣

習靜

自慰

夜讀

有感

解惑

迎春花

露桃花

柳花

萱花

葵花榴花

荷花

鳳仙花

桂花

菊花

梅花

水仙花

薔薇花

啓明星

上巳

憶渡海

客心

異用



卷五七言絕句

題一峰鳳凰山

題二峰陸寶山

題三峰余山

題四峰細林山

題五峰薛山

題六峰機山

題七峰橫山

題八峰天馬山

題九峰崑山

答贈王雲山原韻五首

答贈顧良哉二首

贈徐諤一

贈陳潛人

贈蔣詒久

遣懷

昨宵

贈盛鼎彝

題亡友藥欄

過龍華古寺

記夢

山僧

歸田後有事公庭過蒙

優禮作此志謝兼以自嘲二首

去年五月鵬集承塵今忽聞鵬化作此志感

十字變體小迴文詩二首

過朱買臣墓

煙雨樓憶舊

蚤發鴛湖

石門道中

西湖

十錦塘

孤山

紫霞山

山行作

飛來峰

懷述堂郭先生

逆風

曉吟

歸舟



价人趙先由南宮廣文改授婁村少尹為作東

籬詩贈之三首

即景

同兒子兆熊訪隱君湘九顧先生

江上二首

閒步

賦得鶯到垂楊不惜聲 聽鶯

一春陰雨臥病兼旬愁緒盈握對景悵然故作此

以志感

和蔡景正紅梅韻四首

再題紅梅一絕句

獨吏吟詩

老猿乞食

作孽戕生

癡人講學

贅孫狼藉

浪子拋家

幫閒得計

奕葉相仍

逆子賣父

中山的派

狼子野心

貪夫狗財

射工伺影

歸真

橫雲書所見

聽鶯

七十口號

山莊

靜坐

卷六五言律詩

贈上洋唐廷一

答贈陸孝毅

答贈姚平山

答贈錫山志萬楊生

答贈平原陸石公

答贈上海唐宸枚

蝴蝶

答贈蔡景正



答贈趙潤川

湘簾

松

竹

贈許白江

贈思兼勝生

贈念哉周生

贈陸宜士

述懷

與兆熊戲語

閒行

草堂二首

學道

書所見

獨坐

登小橫山二首

牡丹

渡海

煙雨樓

過塘西鎮

過松老橋作

杭關夜泊

昭慶寺

古大佛寺

紫陽洞天訪丁野鶴肉身

歸途

對景

紙鳶

自嘲

泛舟余山之麓同老友三四人策杖行吟訪古沐

堂禪師漫賦

啜茗

登一覽樓作

和章鳴岡一覽樓韻

丁未除夕示兆熊

戊申春日示從孫若水

贈南映姪尚義急公

皇上特賜京堂太僕寺少

卿職銜以示寵眷作此志喜

卷七七言律詩



庚子秋日懷樸村大兄 答和吳克仙原韻五章  
辛丑春蒙署提憲陳公先施作此志謝

答和朱畊方原韻 答和徐諤一原韻二首

答和陳潛人原韻 閏六月初六日送鎮臺

陳公回崇攜兆熊同往極蒙優禮書此以志不

忘 贈鎮臺陳公

上大中丞吳公 上大方伯李公

上江寧大叅王公 懷蘇郡家司馬梅崖公

祖 贈江右劉直岫二首

和汪偉人自壽二首 和徐諤一蚤朝詩二首

馮古浦作詩索閱拙稿即用其原韻答之

戲答蔣詒久 寄崇川陸生

答贈上洋潘韓章 答贈童瑩川

上郡侯周祖臺 答贈王西亭給諫先生

贈華邑周父母 答贈孫思九

壽節母某氏 挽扶風君

贈許母張節婦 答贈錢塘王介眉

祝郡侯周祖臺壽 贈山陰胡無波

送郭景文北歸 謝郡侯周祖臺

自題小照 挽崇川孝廉鈕星濤

癸卯上元後五日同顧湘九朱初晴昆季坐話

贈副總戎尚公 贈邑侯劉公



答贈長洲朱公季

悼河臺陳公

送陳含美莖

題周復周兩尊人行狀

後兼示其令子念哉

四月六日華亭周父母

賜小兒兆熊端溪硯中書君及餘物數種作此

代謝

端陽前一日婁邑劉父

母賜小兒兆熊筆墨衣帽靴帶及佳菓等物作

此代謝

答贈虬江王斗初

答贈表姪周軒三

上浙江李大中丞祖臺

奉寄浙江大叅家梅崖公祖

孟秋七日蒙大都督高憲祖臺台東下頒作此奉

謝

送昊霑四姪入都會試

訓兆熊

憶辛丑歲於姑蘇半塘

同兆熊訪永照大師

壽印省齋七十無似令

嗣賡鹿脯昌

答贈閩中道臺韓公即

用原韻

副總戎冉公陞任來松

未及致賀反承先施作此志感

奉贈金山衛副總戎冉公

懷崇川鎮臺陳公

奉贈華亭周公

呈司馬俞公祖

贈奉賢父母張公

繆虞臯作蟬聯韻五章以寫愁悶讀之淒然有感

作此慰之

挽梅花主人姚藥巖廣

文

嘉定樸村大兄枉顧叙



話

聞述堂郭師臺告致歸

里有贈

贈維揚郭南江孝廉

上宮傳尚書大都督魏公二首

送副總戎冉公之任包山兼有觀荷之訂

贈署華亭縣青溪父母張公

拏舟奉送郭述堂師臺歸里二首

呈郡侯周公祖

丁未閏上巳作二首

贈鷗亭汪太翁十首

鎮臺陳公來松署篆未

及數天忽接

特簡浙提之

命作此志賀

七十初度四首

贈春坊志山王先生陳

情歸養

卷八七言律詩

咏五色雲

咏千葉荷花梔子

春草

梅

戲咏風花雪月限七陽韻四首

戲咏風花雪月限一先韻四首

白秋海棠

瘦狗

惡木

迴廊

螢火

廣富林僧房小憩

謙益堂中經年空鎖偶一啓戶見萱花盛開索酒

酬之喜而賦此

咏茉莉花

煮茶

閒吟戲作數目詩



擇居

迷渡

孤篷夜雨

閒步容膝齋

一夢

過泖湖

清明日掃墓作

對鏡

宣妙講寺小憩

牡丹花前作

除夕步陳潛人韻

元旦步陳潛人韻

過紫岡

登小赤壁

咏日本山茶

曉晴

月夜

曉起

求仙

泛舟渡斜塘

同兆熊禮永清菴大士

夜泊泖西永清菴側

武塘懷舊

過嘉興南湖

禮法相寺定光化身

雲林寺訪諦和尚知已

化去詩以悼之

玉泉寺池中五色魚盜

去一空作此志慨

重問西湖

孤山弔林和靖

拜岳武穆墓

拜于忠肅墓

上天竺寄慨

飛來峰

白沙泉

城隍山寄眺

望錢塘江

上吳山絕頂

浴佛日過南屏淨慈寺

湖心亭

蚕事嘆

謝村道中

重過鴛湖自角里街步



至朱買臣墓

有悟

獨坐振秀堂

蘇松兩郡浮糧雍正三

年春奉 特恩減四十五萬兩著為定例萬民

遍德作此以志慶幸 新燕三首

喜得異種洋茶一本幽香殊絕花如楊妃吐舌之

狀故作此詩

春寒苦雨

寒食日作

舟中掃墓作

登一覽樓步夏元吉先生韻三首

靜觀

賦得鶯到垂楊不惜聲

即景

獨坐

賦得春歸人未歸

泛舟泖濱訪八十壽翁

汪處士

五君詠五首

弔王玠右先生

弔吳日干先生

憶潘洛符先生

弔朱萼江先生

挽漢瞻大兄

悼岑遙青

憶酒顛王子

北郭嘆

弔俞陳芳廣文

弔金德籓廣文

得盛悔亭凶問

老猿

惡鳥

洞玄君

指迷

贈太倉王貞女

上巳前一日泛舟八曲經過籛山有作

泊舟薛澱湖中

反朴



空明子詩集目錄  
三  
誕日即景用工部人生七十古來稀爲首句

空明子詩集卷之一

華亭張榮景桓著

男八齡童子兆熊較

我生篇三十二章

我生之初五行旺木順治紀年一十有六  
歲在己亥庭紛蘭菊時維暮春柳條放綠  
上巳逢閏生申交祝轉盼五年爰就外塾  
四子六經夙夜勤讀十歲學文曷敢畏縮才情汎濫不  
受拘束

年齒加長病爍肌肉臥牀三載幾致不祿哀哀父母我  
顧我復

豈無名醫難保反覆豈無明神難決禍福奄奄一息親



朋聚哭

我心自忖一線可續不必藥石不必筮卜扶我端坐氣  
自充足年復一年二豎盡逐

載駕我舟載推我轂奔走名場塵鞅鹿鹿七戰棘闈竟  
成雌伏

年過四十俾我笑獨父兮母兮何天降酷

逮至五旬二子命促或云有故魂驚碎玉

從此閉門謝彼流俗日坐斗室還淳反樸言行必顧規  
矩益肅夏六七年扶風坐蓐

十月將望蘭芬桂馥生我兆熊金盆試沐秀眷豐角褒  
詞盈幅

豈期晚景秉鐸江北望

闕拜

恩齒疎鬢禿安敢告

勞勉強匍匐

校文閱武禮陶樂淑有善必旌拜及茅屋人潔其操秋  
陽載暴有過必規憲轅狂觸公爾忘身安能碌碌

血氣旣衰手足若枯求退情深長言上告

亟返丘園另立規局屏除玩好驅遣奴僕

親知到門村醪野菽不事紛華布帛菽粟見性明心義  
精仁熟

不料羗娘變成蜂毒亦有豺狼肆其怒目亦有瘳狗信  
信高陸亦有狡兔窟中旁矚

鳴鴉嘴利射工影速通衢掠人載止載宿



空明子詩集卷之一  
我生何辜逢此禽犢我罪伊何遭此謗讟  
天道不爽幽無不燭犀照澈膽貫盈莫贖  
雷霆一聲山鬼躑躅辨我之寃洗我之辱何以頌之  
多是祝

天生大賢爲世良牧同寅協恭正已率屬

指郡侯周祖臺

公生三韓天生實篤錦衣狐裘官方之鶻

惠我烝民各遂其欲願爾鳳毛鳳池蚤浴令名遠播

綸音重複

愧余不材株守松竹佳樹葱翠芳草綠縵烏音時來清  
風穆穆命我小婦釀酒百斛

招我同志倒彼醴醪攜我兆熊吟詩一曲荷芰紛披水

紋如縠小人弗親格言宜錄進德修業聊以自勗

再命兆熊爰拊我腹此中何有不盈一掬

敬謹自持仁義自沃法不敢玩禮不敢瀆歡不敢盡貨

不敢贖苟或不然俾民大戮

六十五年一飯兩粥不御紈素不理絲竹黽勉一生苦

守空谷望汝成人延師教育日就月將庶幾式穀敬爾

聽之小子是囑

贈邑侯劉公七章

聖主當陽窮奇束手仁讓成風道光德厚

六十餘年栽培益久仁武不殺漸滋小醜

凱風南來吹彼稂莠稂莠聿興農夫之咎



爰有神君來自江右懲彼狂夫載掣其肘  
法立必行澤遍黔首惡草盡芟佳苗克茂  
海市蜃樓奸謀利口霹靂一聲山鬼狂走  
無利不興無冤不剖政清民樂名重山斗

有鳥三章

有鳥有鳥集於芑桑呼彼同類載鼓其簧始及中國迨  
至大荒一唱百和俾民卒狂

有鳥有鳥集於山曲赤睛烏喙蛇蝎比毒載弄其音覆  
我邦族扇其餘殃俾民不祿

有鳥有鳥集於中田載啄我粟載飲我泉矢其餘穢流  
毒盈川胡彼愚人滅頂沉淵

述兆熊命名取字之由

憶未得子憂心忡忡辛卯陽月有夢感通賜字延年賜  
名非熊以兆易非改筆成紅拜而受之四體和融  
一隔二載茫無消息壬辰癸巳如坐荆棘意謂鬼神聰  
明正直豈類今人有言必食  
癸巳三月爰至海濱秦公裕伯爲邑之神著靈四郡大  
地陽春有求必應默祐斯民許我隔歲許我育麟許我  
月夕許我花晨予也不揣致語諄諄倘幸生男賜姓曰  
秦神若首肯我意得伸

又有貞孝李門之婦結禱八月厥天蚤仆茹荼嚼蘖食  
貧至暮蓋棺事定暴露是懼猶子王生匍匐來訃擇地



空明子詩集卷之一  
四  
合塋歡騰道路會塋千人涕泗如雨展拜墓下咸來告  
訴夫名松兮相識有素婦字蘭兮貞潔是慕靈若有知  
亦不我忤百里而遙幽隱潛赴贈我明珠忽焉驚寤  
迨至甲午日吉時良扶風有娠卜云其昌十月將望蘭  
菊流芳五桂並發香風滿堂辛巳叶吉厥聲嚶嚶乳母  
試沐沐以蘭湯  
未及彌月親朋咸至湯餅會中文歡把臂歡生口角語  
無倫次簫管並陳樂舞咸備歌聲悅耳四座皆醉容俱  
致詞幸識麟瑞一見歡然問名求示予謂神貺豈敢多  
事小字秦松以答神賜名仍兆熊延年其字

挽錫安蔣君

錫安蔣先生者一生樂善孝友性成閉門課子  
最嚴令嗣詒久卓民尊三三君童年皆成名士  
先生與予最稱莫逆作此以當季鷹之鼓琴不  
知彥先復能賞此否也

先型不遠有典有則惟我蔣君古訓是飭學必希賢孝  
則竭力承歡膝下小心翼翼推恩廣愛靡弗周卹  
天錫爾類鳳毛絡繹三株珠樹以報爾德文燄冲天五  
色組織門庭喜起九苞展翮方期上壽樂此安宅  
何天降凶日中則昃三徑就荒老成莫覲聿追來孝孝  
子踊擗一束生芻言念疇昔哀我人斯百夫之特



空明子詩集卷之二

華亭張榮景桓著

男八齡童子兆熊較

贈焦廣期

西風吹落日日落色淡黃穿林入空際照我徵君房徵君坐高閣奕奕燦文光竹木掩蓬戶經史嗽餘芳隔岸多桃李迴飈度危墻或飄衫袖上或點几席旁芝蘭發庭階馥馥生奇香亮節殊難擬庶幾古哉桑徵君多鳳毛振翮鳴高岡元亮空責子徵君樂未央

贈華邑周父母

一生安我愚六十始授職五月至崇川君時正行役紳士多頌聲口碑實籍籍一時未得見恨不生羽翼迨歸



始結契對面如舊識自憐年齒衰求退歸思亟蒙君過  
褒獎由衷非外飾及我出國門相送河橋側從此各一  
天望雲情曷極君名日漸盛光燄不可抑簡在出 帝  
心大邦虛左席   陞見寵眷殷   天顏動喜色蒞政甫  
三月頑梗盡潛匿平反鮮滯獄催科量民力雨露無偏  
私雷霆亦叵測合邑仰神君聰明出典則我子甫八齡  
晉謁蒙拂拭但愁點點兒負荷恐弗克託根在門牆蓬  
生待麻直老朽慚無報時時誦明德

贈馮方山

賦繁民已困塘傾民益危海濤十萬里風伯爲揚旗沐  
日夏浴月浸天寧有期嚙沙僅細事崩崖無常時頗有  
土塘護鹹滷不敢窺佳苗得種莠吉貝實離離邇年風  
汎大土木竟莫支桑田變滄海下民空其咨田去賦尚  
存無米誰能炊天生豪傑士侃侃直陳詞跋涉不憚勞  
饑溺身任之   帝閭未易叩結念恒在茲忠孝本世澤  
立節非好奇願君益努力無爲中道疑

答贈陸叙伯

世間誰最樂盛年玉蚤售一歲職九遷珥貂拖紫綬言  
聽復計從莫或居其右王公日候門駿馬沙堤驟諫草  
及彈章時時出諸袖袞職偶有關及時速補救四海致  
乂安冷名垂厥後此是天上人靈爽降列宿世間誰最  
榮文章先宇宙寂寂處一室胸中懷錦繡句讀必參訂



性天悉研究熒熒一盞燈書聲伴殘漏茅塞啓後生窮  
經至皓首但飮義理肥不顧形容瘦文燄萬丈高那與  
流輩鬪舉動見典型風雅號耆舊得失雖殊塗此理無  
差繆先生蚤見及甕牖那嫌陋寧與蘭芬親豈敢慕銅  
臭君子中道立願祝仁者壽

述懷

善旣未能爲惡亦何敢作寂寂鎖重門我自守淡泊咀  
味六經蘊文字覺糟粕豈期時命乖海外秉木鐸自料  
力不勝解組歸丘壑鍵戶謝時流寓言聊寄託有子不  
如人豈是冲天鶴五齡能握筆觀者成繹絡親友多譽  
詞不過供一噓何至撻人忌含沙噴旁礪拙咏蒙譏評

蕪詞欲筆削老夫殊不怪此子善戲謔才華實少有謔  
之未爲虐文理云不通未免欠斟酌借文欲罵人此疾  
猶可卻借題欲殺人此病不可藥我本世外人不爲名  
利縛我本海上鷗不爲鷲鳥搏我本百鍊金不爲狂燄  
鑠神明實不遠鋤强更扶弱倏而雷霆震翹兩咸驚愕  
白日麗中天鬼魅自消索嗟爾無賴兒曷不自忖度挑  
達在城闈唱和風吹穉空著好衣冠燕語喧樓閣遊蜂  
閒趁花浪蝶穿簾幕飽煖誠有餘能不生愧忤我老仍  
閉門教子尋獨樂

延恩院訪慎微上人

扁舟泛急水繫纜延恩院院深花木疎金碧輝宮殿門



臨第一橋古浦曳白練隔岸楊柳風捲波若激箭遠山  
蔽浮埃穿簾逗輕燕入院晤老僧爲設伊蒲饌微吟叅  
至理光爍端溪硯瑞氣籠梵宮法相朝暮變四方咸瞻  
禮慈雲常示現有時闔雙扉靜聽流鶯囀有時攜竹杖  
開襟受風扇有時炷沉檀閒看高士傳西方多名藍蓮  
社通一線眷彼世外樂令我動遐羨

贈顧湘九

香逕一灣曲高柯蔭雙扉中有百歲人讀書恒樂饑便  
便富經史纂述筆如飛種花閒窗下花落紅成圍有時  
點書案有時侵客衣一門和氣萃蘭玉發芳菲對景獨  
斟酌且莫惜斜暉西山多爽氣結伴坐翠微

答贈述堂郭師臺原韻

斯文屬大賢撐天擎隻手起衰奪造化兒視韓與柳芳  
名世共仰燦爛煥星斗愧予不出戶每事落人後撫衷  
還自問空空竟何有晚歲得一兒令我開笑口未週能  
識字器度頗不苟五齡就外傳自辰直至酉過蒙諸先  
達執手呼小友今幸登龍門益足感高厚切磋在童年  
際遇良非偶予老實無能御馬恐索朽典型欣在望文  
若盤珠走化雨及時來敬聽貴虛受阿熊幸勉旃登堂  
祝耆壽

將有武林之行作此致慨

三年不出門傷鳥斂倦翮掩戶謝時流我自守安宅中



山有豺狼南山多白額射工掠人影木客善變易孤館  
憎狐媚腐鼠笑鷓嚇憶自庚子春解組戀泉石所患在  
爲師鱸堂避講席士庶雖攀留歸心益逼迫入門訓兆  
熊豈敢事姑惜黽勉又二年毛羽漸潤澤褒美出羣賢  
贈言竟成冊自謂少罪戾庶幾免跼踏豈料施恩處釁  
反在肘腋張冠將李戴遂欲混黑白一吠來衆咻妖言  
動千百霹靂震青天犀照辨狂逆陰譴更不誣八九奪  
魂魄漏網一兩輩犯肘罹三尺東郭乞墦間堪嗟貧亦  
赤公道自在人安能玷白壁操守益自嚴教子倍督責  
往來數君子至誠吐肝膈交好結素心談笑頗睽隔索  
居旣已久未免生厭數聊爲武林行對境寫悅懌

題陳檢亭三蕉書屋用東坡西齋韻

坡仙飲三蕉醉擁書滿牀借此顏其室種蕉盈丈長賦  
詩蕉窗下啣杯興轉狂扶疎垂高蔭綠扇弄微涼斜捲  
芳心怯靈苗別有香初日照雲葉蕩颺發景光舉頭矚  
孤翠佳思隨風翔蕉下立雙鶴清宵引長吭採葉任揮  
灑斟滿酌麴生年年醉綠天爲我謝東皇

舟中風雨

去時四日風歸時三日雨孤舟生微涼聊與談今古呼  
兒坐我旁開卷非小補黽勉貴及時寸陰惜自禹荒雞  
喔喔鳴劉琨夜起舞季鷹念尊鱸知幾蚤解組出處法  
前民立志尤宜努道高毀必至往事鑑尼父况乎今之



人舉動易遭侮古來豪傑士拂亂不覺苦特立而獨行  
心不羨華廡如有用我者憲章在文武德意同覆載仁  
恩遍下土苟或不遇時蕭然樂環堵自念老青氈歸田  
學爲圃文字久廢棄望敵偃旗鼓交親還謝絕衰病如  
聾瞽甘貧復安賤豈必灌絳伍屬望在汝身修德續乃  
祖小子庶無怠弗謂參也魯

十五夜望月

登閣望明月桂輪恰初滿出海擎玉盤凌空走冰盃宛  
似越夷光入宮春意懶又如蜀文君風流且放誕唯彼  
宦遊子一見腸欲斷獨有世外人對之情欸欸大地變  
銀海瑤光驚四散好風從南來吹我衣帶緩

贈趙价人先生東籬詩

午夢方欲醒鶯聲喚起時幽蘭扇餘芳忽接東籬詩  
好淡似菊人淡想同之千載陶元亮風雅賴主持羨君  
膺講席多士欣得師而今來春風伯淳轉在茲愧余學  
術疎半生恒守雌閉戶謝人立敢曰莫我知何期千里  
駒具彼鸞鳳姿念及林下客惠我黃絹辭琴堂清若水  
暖日薰風吹對酒寫逸興麗藻出新思行當窺吏隱還  
與話東籬

夜坐

青燐杳冥冥風雨殊未了登閣發長吟黑霧罩樹杪遠  
景迷沉燼但覺危樓小掩窗焚名香獨坐靜悄悄品水



試龍團雁聲落天表

女蘿嘆

初日照高閣淡雲流素波矯首一遐眺新綠含青螺北  
山不盈尺朝霞烘微醅薰風自南來吹彼蔦與蘿攀援  
附喬木瞬息成差我嬌好滋雨露敷榮託庭柯欣欣騁  
得意長日恣婆娑但愁衆芳歇西風奈若何

歸帆

枯樹噪乾鵲扁舟初出浦風順好揚帆輕雲籠日午巨  
浪賈餘勇迴颺激微雨銀濤倏人立一仰更一俯如聞  
殷殷雷天半震鼉鼓古廟多傾頽崩崖類劈斧乘潮勢  
若奔一灣露沙土收帆見新月楊柳江干舞

自幸篇

我年交七十所患在一身或時頭欲暈或時脚難伸夜  
臥不得寐朝起若傷神對卷眼欲花一似隔埃塵握管  
心枯槁枵腹坐愁貧任他說我假憑誰笑我真我本瞋  
睡漢朽木未逢春遇事多拘執不學車上輪見人先卻  
走不學席上珍臨淵魚可羨不學鈎上綸隨波香可擷  
不學水上尊名場不欲近非曰沮溺倫道心常自生座  
上少雜賓好音接鶯燕錦褥得花茵泛舟峰泖間同志  
訪逸民回首少壯時宛若隔立人猛虎跳我旁對之不  
敢嗔毒蛇梗我道避之弗與論看人登仙去敬謝交與  
親閉門獨守拙返樸更還淳狂吟成僻性傲骨益嶙峋



悠悠五十年軒冕都沉淪日月忽云邁行李殊艱辛同  
類復相軋齒豁髮變銀咄咄日書空行與鬼爲隣幸予  
甘恬澹猶爲草莽臣

七十誕辰示延年

回想生爾時我年將望六爾未及三齡大母已就木初  
交四齡後秉鐸往江北繫念實可憐求退苦欲速歸特  
擇良師五齡就外塾先誦四子書六經期熟讀八齡攻  
舉業時菽滿書簾囑爾要沉思精義貴反覆間讀史漢  
書唐宋亦薰沐綱鑑作晚課詩篇隨記錄十一學作文  
枯窘不盈幅黽勉六七載寒暑幾徃復屢蒙大賢獎能  
不生愧慙倏忽又兩年文理稍純熟六月不避蚊除夕  
敢畏縮幸未染習氣工夫非一蹴小子開卷時慎弗徒  
過目從此益勉旃莫負空洞腹

聞徐州使君三韓蔚千張祖臺有

特簡雲間郡

侯之命作此志喜

皇祖發祥地天眷亦奇哉所產多名賢公尤命世才烹  
鮮試昭陽解慍阜民財教化已大行士類賴栽培調簪  
至崇邑爭看杜母來政成修邑志筆削名實該口碑溢  
海宇清操絕塵埃 聖明深眷顧陞見遊蓬萊一遷彭  
城牧聲望高巍巍 特簡理大郡雲漢象昭回瑞靄護  
茸城竹馬迎童孩和羹正有待指日調鹽梅

贈婁父母蕭公



我邑多賢宰新政尤慈祥公餘進髦士亶亶論文章仁  
風翔四國雨露遍遐方予自解組歸泉石成膏肓閉戶  
謝賓客十載遠名場有子年舞勺應試登公堂雛鶯初  
出谷迎風殊彷徨蒙公亟栽培桃李植門牆親承大賢  
教樂育正未央飲食兼教誨銘刻何能忘

空明子詩集卷之三

華亭張榮景桓著

男八齡童子兆熊較

雲間太守行爲郡侯 周祖臺賦

雲間自昔號繇劇 天子特簡二千石汝南大賢天下  
才西江勲名書竹帛今來江左益出奇怒鵬大展搏風  
翮洞悉民隱出至誠片言折獄誅狂逆培植士類成棟  
梁不使豺狼入疆場民間豈止五袴謠游手好閒俱斂  
迹頻年水利無人講廣塘水淺僅盈尺舟楫往來竟不  
通惟有經時候潮汐一朝下令欲濬河滿城焚香手加  
額由來水道有故址咨詢老成檢圖籍良民守法勤赴  
工豪強孰敢逞匪僻四方百貨輻輳集行商坐賈沾恩



澤勸農載酒勤慰勞嘉苗翼翼土地闢風行草偃疾於  
駛未及暮年心面革雖有餘孽形影潛斧鉞雷霆喪魂  
魄弭盜有奇方驅蝗多善策猛虎群渡河魍魅各逃匿  
陰雲四散霧盡消重見天青與日白

自題崇川歸里圖

海天蒼涼一輪日照徹九州併萬國此時正屬暮春天  
崇川桃李增顏色先生解組賦歸來滿城士庶聲唧唧  
共云今始得良師坐鎮正堪一世則仕未暮年化已行  
春風吹遍陽和德忽然引年欲告退憲府攀留留不得  
農夫咸輟耕紅女亦停織四民罷業日皇皇相商欲把  
城門塞先生聞之殊不然自愧德涼難稱職優禮出自

上將軍節使寵渥誠奇特副帥相看誼更親橫海樓船

如舊識

指馬何金岳等諸公

花縣同寅更協恭

指似齊王公及念吾周公

文好

不獨在文墨咸來相勸莫亟歸易俗移風在頃刻且待  
三年政大成禮陶樂淑江南北先生頓首再頓首我年  
已邁力弗克身僅一子纔五齡啓後尤宜勤卯翼可憐  
齒髮衰日中已過昃先業恐隕墜私心常惻惻尸位慚  
素餐發憤致忘食屋漏每加謹衾影蚤嚴飭動作多忤  
俗豈堪衆矜式決意返故鄉此心實不惑凌晨徒步出  
國門攀號遮道幾萬億冠蓋車馬聲如雷縉紳瓊琚投  
贈亟諸生長慟翻海濤窮孀掩泣河橋側豪士拔劍仰  
看天高人把袂情何極堤柳攀欲盡別淚終難抑涕泗



出至誠非由外裝飾先生長揖獨上船  
趺坐無言竟默  
默海波不生若坦道好風遙送布帆直

寄大總戎陳公

海風捲沙六月秋怒濤拍浪天地浮  
指麾樓船及橫海  
篤生元老精運籌先公當年著奇績  
帝心簡在念不休  
鳳毛繼起光奕奕棣萼連枝並五侯  
只今三江號鎖鑰  
十郡屏藩資壯猷  
轅門鼓角驚小醜  
弓刀欲奮神鬼愁  
願公功名書竹帛指日上公正黑頭

懷大叅魏公

憶昔崇川服官日行年正當六十一  
崇川節使有魏公  
相國家聲孰與匹京江敷政位望隆  
東瀛督餉心尤實

文彩風流世共傳五色瑤華夢生筆  
僕時追隨叨末座  
愛我不啻加諸膝引年告退公固留  
賦詩送別情洋溢  
歸來裝潢掛草堂滿堂香風拂琴瑟

憶副總戎冉公

我至崇川纔片刻將軍冒雨郊迎亟  
漫將熱意加冷官  
寒暄先問匆匆色事無巨細必忠告  
長言爲我開茅塞  
督餉治兵贊上公海不揚波實有力  
身忝姻婭媿粗疎  
周旋左右叨培植乞休蒙送出國門  
執手江干情惻惻  
何時對君頌高誼此日憶君忘不得

贈姚藥巖

甚矣吾衰矣君何益壯哉君年長我  
一十九卻能返老



同嬰孩子史任咳唾胸羅八斗才蓬蒿滿徑門不掩古  
梅澹宕繡綠苔亭多問字客載酒倒金壘亦有探梅人  
結伴共追陪君竟傲然坐一榻蕭然自遠絕點埃非惟  
不迎亦不送客同梁燕自去來一生儒素致足樂不附  
貴戚遠禍胎吁嗟乎只今金紫在何處側身長望生餘  
哀豈如逃名出世外一任天地自栽培我因見君益自  
勵高山在望瞻崔嵬南浦月初上西堂桂下開相期振  
襟袖長嘯凌高臺與君及時但行樂日月一去終不迴

將進酒爲王虛亭賦

將進酒莫開口讀書畏支離涉世懼掣肘不如披髮且  
佯狂浮雲富貴究何有小子三四人老者一二友春風

拂滿座玉屑飄瓊玖再進酒君肯否我一杯君百斗我  
一篇君百首輕咏直教雲出山豪吟能令鬼獻醜長劍  
可使刺妖狐短刀亦足斬邪狗三進酒容我剖豁我襟  
拋我綬忘卻九州及萬國說甚五車并二酉抱我琴叩  
我缶牽我衣把我手園有桃堤有柳塘有芰池有藕山  
巔水涯胡亂走意彌親情益厚對酒不飲誰任咎上壽  
祇得百二十中壽纔過九十九

挽俞榭亭

君竟歿莫須哀彭殤等一轍浮雲安在哉請看金紫客  
誰不歸夜臺古來亦有不歿士文章功業同昭回憶君  
盛年走名場獻書直上游蓬萊珥筆大廷纔一載寒氊



寂寞埋塵埃又從淮陰遷谷水三旬九食印生苔天上  
樓成須作記魯陽難返日西頽至今一卷易知錄豈比  
陳王八斗才君雖死莫須哀君家奕葉多栽培次君蚤  
歲登賢書一門鼎盛曷用猜君旣死莫須哀我從蟻穴  
夢大槐幽明從此隔誰與共銜杯遙望秦州一杯土墓  
門閉後永不開

苦熱行

西南炎炎鼓烈吹羲輪燒空火欲墜揮汗如湯蒸大地  
白鳥刺人嘴轉利合眼不得頻憇臂庶幾臨池對荷芰  
清香入脾侵口鼻因見鷺鷥濕雙翅小魚飛來投薄贄  
人生愛熱苦自累譬如癩人還酒醉狂言四出若病祟  
正人君子多見棄遂致親戚遠潛避朋友側目增長喟  
看汝何年發慚愧此時熱極病益熾他病可藥熱難治  
且待一月涼颼至炎炎之態曷所肆

和王雲山贈兆熊原韻

月光弄影幽且清湘簾不掛空復明熒熒一燈照簷楹  
童子書字看者驚未書先磨墨數升梯几踏凳若飛騰  
錫山楊生我見久世間無物不有偶然而入法總餘技  
經史必須先講究他時立身定要識廉耻莫因同學少  
年輕裘肥馬自愧原思陋從來富貴等浮雲豈如玄石  
一醉千日沽得中山酒

贈朱國士



世人誰敢號國士君能獨解非難事讀破萬卷究性天  
壯年立定希賢志持躬炳炳凜凜四知浩然獨往配道義  
出處不苟步前民千言一掃多奇肆有此鴻文不炫長  
豈貪近功與小利結交未肯同儕伍瞬息千里必騏驥  
養成頭角待風雷此是國家大祥瑞

答贈馮龍孫

龍孫生辰與我同今年正當六十五亦是天涯失意人  
空號酒龍與詩虎沉酣浪戰四十載竟似窮兵夜獨舞  
矮窗寂寞燈不紅逢逢聽徹譙樓鼓筆爲耒今硯作田  
舌耕費盡經營苦啼饑號寒終不免十口繫心究何補  
嗟乎嗟乎生平羞與噲爲伍勸君此力還宜努龍頭畢

竟屬龍孫會看一舉繩其武况乎君家直節天下聞五

王先生是令祖

五王先生諱明玠  
係龍孫令曾祖

題思兼滕生令祖省廬先生遺照

有客示我圖一軸開卷展覽豁我目問之知是叔繡裔  
始識槎溪老名宿咀嚼道德味有餘潛修不敢欺幽獨  
便便腹笥富二酉猶把一編時誦讀年登耄耋應賓筵  
典型誰不爭推轂親承几杖盡名賢厥後克昌何待卜

題滕希周父子行樂圖

人生百年三萬六誰能消此清閒福何意槎溪有壽翁  
坐玩仙禽友麋鹿靈芝產廣庭幽蘭發空谷桂馥馥兮  
散黃金栢森森而搖綠玉一編日夕不釋手名父之子



必有後鳳毛振起拭目觀文采風流堪領袖嗚呼展圖  
令我心眼開父父子子有是哉一門孝友真足貴世間  
能得幾人來

放歌行

長虹繞空一條赤圓月照地滿輪白水晶盤子珊瑚鞭  
欲駕玉虬未敢前巍巍金闕在何所歷歷白榆銀漢邊  
龜龍麟鳳號四靈裸蟲之中人爲先麒麟四趾能愛物  
鳳凰九苞徒自妍龍除行雨無他技龜僅灼卜供鑽研  
惟人通靈兼明理讀破萬卷四德全萬彙紛投呈妙用  
對景默默奚貴焉我見此景忘不得手拉嫦娥倒琥珀  
吐氣還成百道光散入遙天變五色

戴景南命畫工寫三照左右僧道裝束作此題之  
丈夫讀書名不就幾回欲向空門走一心又欲學神仙  
那知面目仍依舊吁嗟乎楞嚴不必叅南華曷足究承  
先啓後在一身清心寡欲得上壽梧桐畢竟發新枝撐  
天蔽日生機茂由來仙佛本虛空幸得兩家侍左右主  
張全仗中坐人多少事功留在後

包山歌

包山縹緲高插天下通龍窟生雲煙靈威丈人今何在  
石鐘石鼓徒空傳洞有三門會一穴金庭玉柱相盤旋  
坐鎮五湖三萬六千頃銀濤雪浪滾滾納百川上跨江  
浙兩省三大郡一望七十二峰若比肩神禹藏書經今



四千有餘歲漢時劉根學道亦近三千年洞天之中號  
第九潛行水底地脉穿林屋洞中尋石燕毛公壇畔挾  
飛仙桃花塢邊一陣雨消夏灣頭十丈蓮靈棲邃構嘆  
未有還有上方下方石公龍頭金鐸諸勝如蟬聯月明  
夜靜波不興湖光灩灩泛瓊田嫦娥踏空散霞綺宛似  
益州新造十樣之鸞箋有時老龍起舞日色暗魚蝦跳  
躍爭後先山深無人喬木古饑蛟覓食流饒涎重岡複  
嶺數不盡梵宮仙觀何綿綿遮星蔽日千章樹度莽穿  
林百道泉閭巷井舍近太古雞鳴犬吠白雲巔登高吳  
越只在望桑麻奕奕風景妍回想底定功在禹繼禹之  
後賴諸賢不然懷山襄陵水浩浩爲巢營窟猶顛連

題兆熊小言集

憶爾初生時望爾蚤成立未及三齡爾母亡漸看爾年  
過一十五齡晉謁上將軍推解復蒙賢郡邑幸遇名儒  
開講堂絳帷又許從容入師門親炙三四年精髓安能  
一旦吸辛苦學爲文陳言休勦襲述堂解組賦歸歟話  
別河橋兩相泣幸而請業得良師日就月將須汲汲先  
正示典型黽勉勤學習母爲熟爛調糟粕不留汁弗存  
高遠心筆下滋生澀我年日漸衰消遣賴篇什爾年纔  
十齡吟咏非所急先生禁爾莫作詩爾能自愧知悒悒  
先生愛爾轉勸梓我又安能復固執回思昔者述堂曾  
試以小言今則竟名小言集



捉虎行

長官愛民如保赤特遣役人擒白額誰知虎害益紛紛  
荼毒一方及行客虎害不除長官怒役人依限受鞭責  
鞭責不停可奈何陰風慘慘愁日夕此時此際難爲情  
權將獐兔恣狼籍食肉寢皮用不勝饜餘換酒浮太白  
夜臥醉醒還自忖捉得虎來又何益不如遠害覓野味  
妻孥飽煖咸悅懌山高樹密虎窟深種類豈知盈千百  
群虎出山孰敢攫跳躍一去杳無迹放虎歸山罪曷逃  
究竟捉虎無善策長官聞言殊憫然張榜通衢懸賞格  
賞格空懸應募少虎來依舊如疇昔虎不畏役役畏虎  
聞風卻走喪魂魄豈料反借捉虎名走入鄉邨作屠伯  
沿邨雞犬不得留兒啼女哭多驚嚇可憐虎害仍未除  
徒使無辜遭橫逆

懷古

君莫喜亦莫愁人生等夢幻世事類浮漚求爲可知自  
在我慎弗貶節徒浪遊黃金臺平郭隗歟當年自薦殊  
堪羞尙父遇主後車載傳說肖形版築求君相遇合有  
定命曷用皇皇生怨尤卓哉孔明不可及三顧草廬足  
千秋

時雨歌

五月十二簷馬鳴忽來大雨如盆傾隔堤攪翻楊柳綠  
奔雲四走宿鳥驚一時道路行人絕前溪呶啞舟欲橫



閉門上漏并下濕補天無術心怛怛半月以來不得住  
朝暮但聞雷霆聲倏過夏至交小暑內河水漲兩岸平  
甘霖已足農夫喜青苗插遍芽漸萌佇見五風十日雨  
時和年豐祝 聖明

雍正四年六月六日歌

我年纔過六十七經過二萬四千五百四十有四日就  
中讀書幾十年就中潛心耽著述就中跌坐學神仙就  
中臥牀櫻宿疾茫乎地厚與天高六十一年才一出不  
合時空天分定誨人不倦原無術亟亟歸來仍杜門門  
外狂風吹鬢篲忽逢大地遍陽春沐我春風四體佚呀  
嗟乎天道福善而惡盈勿謂前程暗如漆

洋繡球花爲庶常六雅儲先生賦

繡球花二月開何爲洋中五月來過時之物曷足貴理  
應擯棄埋塵埃忽有軒軒故交至笑我俗眼真凡胎從  
來遲早命付予天公各自有安排變幻五色奪造化豈  
比春花白皚皚我曾欲置此花於衆芳之上果見聲價  
轟如雷君不見渭水濱後車載雪霜盈顛八十外

行行曲

行一步止一步行行且止日欲暮白楊蕭蕭捲荒煙草  
深泥滑水沒路隔江傾頽望古廟廟門剝落殘碑仆橫  
斜樹影千萬枝寂莫無言罩宿鷺饑僧宛似入定僧枯  
坐默默若泥塑山鬼夜啼蛇梗道回頭一想成恐怖日



欲暮今日欲暮獨立江干誰問渡

橫雲山小赤壁歌

橫雲山插天表東有魏武之赤壁西通秦皇之馳道或  
人向予言下筆何草草秦皇馳道古所傳魏武赤壁殊  
未曉東坡赤壁已差訛空明赤壁尤顛倒空明子頗煩  
惱史策記不真輿地實難考子莫笑我不讀書念我龍  
鍾年已老况乎凡事何必苦認真君不見山人一去無  
人弔

澱山感

我登澱山頂俯視澱山麓廢塚纍纍不計年殘骸狼籍  
填溝瀆謾謾千尺松脩脩萬竿竹上有鸛巢踞其巔下

有龍洞穿其腹禪堂無人甑塵滿烈烈巨風吹破屋旁  
有霍公祠云是前令築父子旅櫬列東西月黑時聞野  
鬼哭榱崩棟折可奈何敗牆空繡苔紋綠

典房嘆

數椽傍林麓修竹殊楚楚隣園夾左右宛然若別墅一  
朝動利心欲售誰與語朋謀事竟成恣貪飽狼鼠忽有  
一人稱原主相爭相奪真難處我今爲爾剖此事莫浪  
舉君不知機雲兩山原屬陸家業設有煩言誰肯許

斡山吟

舟行八曲裏迤邐沿山麓行過神與余斡山在其北干  
將試劍石尚存童山濯濯乏箭竹玉竇泉名徒飲牛雨華



洞臥樵牧可憐無限買山營別業何爲舍此不構數椽  
屋卻因凌崑失品題遂致此山成幽獨山乎山乎巍然  
高矗若恨生來不遇時應向盧賈諸峰同痛哭

閱潛人陳先生臥佛詩有作

潛人遺我臥佛詩我見此詩苦愛之此詩自有會心處  
落落高致人罕知此詩一出萬仞立縱有和者終莫及  
想見祥風筆底生慶雲遙護天神集能令臥佛醒來吃  
一驚陡然起立撐雙睛常聞宰予晝寢孔暉怒自愧老  
大徒無成避跡西方學土木高臥一床摩我腹就中塊  
壘暗消磨勝似窮途向人哭潛人聞言殊不然低喝一  
聲且安眠儒家曲肱尋真樂豈有如來名浪傳此中空  
空實無有鼻息如雷不在口可憐瞌睡過一生不向乾  
坤弄筋斗空明子勸爾莫惱人一團妙理原無垠不如  
打碎臥佛像虛空粉碎無纖塵

買山引

古人買山住山高風自古今人買山住塗抹五色土樓  
臺亭館閉煙霞不做獨樂傲郿塢真山面目杳難尋曷  
不歸來臥華廡

箕山咏

愛此箕山小點點一拳石山名人罕知陳公志載疇管  
橫亘八九弓高低六七尺潔淨少塵埃孤寂絕游屐聽  
鶯盟鷗從我好結廬三楹貯圖籍澗山十丈峙東南龍



吟洞底通一脉月明風清夜未央狂歌爲爾浮大白

挽範之王先生及二子偕亡歌

文星前宵隕夜臺咄咄怪事共傳東海虛亭先生歸去  
來先生原是一怪物筆底能使江河倒流山嶽頽刻畫  
萬象奪造化神鬼夜哭蛟窟開坤轉乾旋烏兔老老蒼  
無權同死灰斲削太盡福命薄歲歲秋風鍛羽回大鵬  
怒飛九萬里欲飛不得徒自哀怨天只怨天眼瞎浪戰  
棘圍一十八啼饑號寒那忍聞口未出聲氣已咽春雷  
競發綠滿庭芝蘭獨喜兩枝茁無奈霜濃風勢疾親眼  
先見一枝折哭兒未完轉哭身老病何堪腸斷絕交親  
誰不哭劉蕡一朝千古成永別死者不復生生者聊自

活又報風摧第二枝可憐文嗣俱天扎嗚呼哀哉素車  
白馬紛紛來地下聞之應痛殺

薛澱觀漁謠

席帆斜挂五六十遙看漁船打魚急衝波逐浪勢如飛  
濺珠宛似鮫人泣夕陽涵波千頃黃釀得一湖琥珀汁  
醉我百年喫不了輸與西江一口吸漁翁使船如使馬  
歌呼同向煙灘集烹鮮煮酒樂陶然自笑我曹真不及  
浮家原是吾家事蚤辦蓑衣與箬笠

藏金蓮歌

有人遺我藏金蓮勾萌弗達名浪傳世間有名無實人  
所鄙况乎無影無形尤可憐春殘漸至三月半此時青



空明子詩集卷之三  
青纜一見含葩逞豔在何時美人不來空好面

酬崇川父母張公歌

崇川父母張公者諱文英號蔚千三韓人也與予猶子名煜者爲順天癸巳科同榜孝廉初任昭陽教化大行民歌五袴調繁至崇催科有法沙漲均不釐奸剔弊百廢具舉崇人畏威懷德三年政成稱大治焉政餘之暇延請博通先達淹雅鴻儒是究是圖爰作邑志今戊申春志成蒙頒賜一部披閱之下見榮得列名於師表傳後夫官聯志人人可書此志之通例也若夫傳者傳也必其人有實行可傳而後爲之立傳也

憶予自康熙五十八年己亥仲夏蒞任即於五十九年庚子暮春乞休自愧秉鐸不及一載老邁不堪無纖毫善狀恐負祿養告致歸里公自雍正元年癸卯仲冬至崇與予素未通名謬采輿論以扶持名教鼓舞人倫爲居官之實迹以讀書課子神明不衰爲居家之實行鏤之梨棗載入師表傳中以垂不朽夫自有崇明以來師儒之官亦衆且多矣而列傳者止一十八人而予得附於一十八人之末何其幸也况自故明戊辰以後百有餘年歷任者不知凡幾而列傳中竟不一見而予乃獨得列於其中傳又出於



賢侯之手抑更不同已亟欲渡海頌德聞已陞  
任彭城惟有以手加額望雲遙祝而已然而知  
已之感又何能已已爰作長歌用酬雅愛

日月朗照天地開崇川驚喜神君來巖疆在昔號難治  
化理必需天下才釐奸剔弊百事舉豪強斂迹孰敢猜  
慈祥豈弟立根本廉明果斷運化裁政餘之暇修邑乘  
蓮幕上客皆鄒枚循名核實弗寬假志成聲價轟於雷  
如予陋拙亦附傳心長髮短徒自哀願公勲名勒鐘鼎  
明良喜起不休哉

東城曲為宮坊志山王先生賦

我來東城隅爰作東城曲東城所訪是何人卓哉彼美

出名族

先生係姑蘇一領使節回先生以宮坊文衡

陳情

供甘祗半菽

先生歸里時清風數椽遠市塵宛若

在空谷門前寂寂少行人應門只有一老僕愛此靜景

少竚立高樹叅差芳草綠入戶但覺春風多登堂喜見

人如玉

葉甥于岡係先生令坦一時斑衣舞彩謝華袞

絕口不談碁一局安期大棗王母桃羣仙遙向北堂祝



空明子詩集卷之四

華亭張榮景桓著

男八齡童子兆熊較

蕪蘭

蕪蘭有別趣葉葉舞薰風任彼天然性生生自不窮

釀酒

我愛麴中脛清冷可滌胸釀成終日醉塊壘盡銷鎔

奇鬼

釋氏本異教能教龍虎降如何論道德奇鬼夜窺窗

草木嘆

鳶蘿附喬木荆樹原連枝何爲自斬伐經雪益難支

惡木



空明子言集卷之四  
荆棘本惡木弗剪竟成圍忘卻栽培力看看欲刺衣  
癩丐

前邨有癩丐疥癬復癰疽酒食墻間饜逢人又乞餘  
好客

索居甘寂莫叩戶有鴻儒相對叅名理方知德不孤  
攜杖

水平三泖濶日落九峰低值得千回醉攜筇路不迷  
隱士

蒼檜壓山頂返照山益佳山中有隱士情與麋鹿諧  
望月

夜深萬籟寂望月臨高臺對景空極目誰共倒樽罍

靈椿

遥遥八千歲敷榮有靈椿依樹結茅屋高風自絕塵  
孤行

徑深竹掩日天淨江無雲俯仰成佳趣孤行勝樂羣  
交道

交道成市道歸來竟閉門東山豺虎橫避迹欲西奔  
曉寒

乾鵲噪高樹微風扇羽翰曉窗日未上猶帶麥秋寒  
春山

春色赴春山春山綠半環對山看不厭腸斷水潺潺  
老榦



梅老枝欹地松高榦拂天任他桃李盛不與鬪芳妍

晚照

晚山銜落照一片紫瓊瑤此景誰能畫天然不可描

古栢

古栢生僻徑羣梟爭來巢巢成揮不去山鬼復相嘲

望洋

海深豈易涉望洋徒心勞蓬萊不可接極目碧天高

夜窗

夜臥愁難寐明月動高歌長天杳無際銀漢不成波

訪隱

欲訪幽人處一水隔蒹葭溯洄應不遠門對夕陽斜

幽居

垂楊拂古岸野逕空芬芳山花自開落孤鶴獨迴翔

性惡

人云虎生子三產一豹生莫謂豹獨惡二虎亦猙獰

僅見

人性本同類惺惺惜惺惺何爲出門去僅見鬼面青

守恒

峰危石必裂川曲岸必崩誰爲參此理不若守我恒

樹德

大德必不報樹德必成讐此言殊不謬淺喻有耕牛

結契



松竹與梅花霜雪莫能侵相期成久要弗改歲寒心  
手談

長日碁一局忘言事手談機心疑太盛不若坐一龕  
除惡

蛇蝎當孔道必爲衆所殲疾惡本公道無勞卜史占

樂天

嘉禾勤種植惡草盡經芟共樂昇平景輕舟挂布帆

醉人

搏虎徒傷生沉淵竟滅頂可憐長醉人何爲不蚤醒

怪壞

見怪不足怪其怪還自壞餘孽急回頭見之當警戒

永晝

石裂松根老牆傾碧蘚侵一聲消永晝側耳聽鳴禽

坐隱

斷橋編竹補溪盡接疎林獨坐茅簷下悠然見道心

晚眺

溪水漲桃花鱖魚味正美推窗望西山日落暮雲紫

曉窗

曉燈半明滅雞唱殊未已風吹蘭玉香隔窗透殘紙

品茶

夜寤不得寐開簾日又紅品泉誰共語一笑對東風

日本茶花



空明子言集卷之四  
五色洋茶好開時日正遲升堂若含笑莫湯苦催詩

聞鶯

卯酒易爲醉倦眼苦難醒隔岸聞鶯語垂楊已半青

夜景

孤月照庭除飛燕雙徘徊空際一聲響歸鴉集暮槐

西園

西園久寂寂春日又花開裝點亭臺好主人幾度來

登赤壁

赤壁高幾許空山鎖碧苔相看真不厭可惜日西頽

新柳

落日一輪赤返照餘淡黃新柳失顏色垂條空斷腸

卽景

犬吠非因客牛眠只爲閒野花無限好春色滿空山

叅道

塵緣猶未捐豈合游此地試問秦松兒西來究何意

柳絮

柳枝發柳花飛絮何匆遽不料三日雨枝頭還着絮

曉鶯

秦松愛名藍名藍多佳樹曉鶯發好音啼盡梅黃雨

渡湖

日落泖湖明光散千條線倏忽晚霞生水天成一片

把釣



水清鮮巨鱗持竿爲衆笑所以臨淵人未敢輕下釣  
習靜

凡人空則靈萬物成必破達摩十九年所以面壁坐  
自慰

同學多青雲春華俱蚤謝惟我獨安貧庶幾如食蔗  
夜讀

齒疎髮復脫形容變老狀讀書至更深衰病竟無恙  
有感

共羨南征雁高飛任所適得意能幾時何爲碎羽翻  
解惑

魯國得商羊楚人獲萍實不遇我宣尼疑殺千萬億

迎春花

小草無知物如何預識春  
迎來無用處徒自惱幽人

露桃花

露桃開爛熳已勝武陵春  
此地殊堪賞還憐洞裏人

柳花

柳絮飄殘後浮萍化水濱  
一池新漲綠豈羨錦爲茵

萱花

萱發北窗下忘憂盡道真  
莫言徒樹背於我合相親

葵花榴花

蜀葵方逞豔榴火一番新  
鬪茗閒窗下何須漉葛巾

荷花



空明子詩集卷之四  
六  
荷葉田田好蓮花簇簇新科頭松竹下臥石及清晨  
鳳仙花

菊婢真堪愛桐陰滿四隣一尊聊自酌坐待月如銀  
桂花

叢桂小山放登樓不厭頻衆香飄戶牖殊覺隔凡塵  
菊花

誰云彭澤後愛菊絕無人若有王弘酒朝朝洽比隣  
梅花

嶺上開何蚤南枝先報春廣平詞賦好獨步樂天真  
水仙花

三至花枝罕水仙最可人莫愁無伴侶窗畔有長春

薔薇花

絕勝佳人笑嬌容壓麗娟賜袍陳濬得狂豔總堪憐

啓明星

漏殘天未曉一點穿林杪獨讓孤月明回視衆星小

上巳

修禊蘭亭後年年佳會同誰人能繼得溪水空流東

憶渡海

海水高無極衝波一艇先望雲不見地還憶十年前

客心

我心本坦然客心怕荆棘坦然終無他荆棘自不測

異用



佳茗與佳釀可潤詩腸枯人各有嗜好用之非同途

空明子詩集卷之五

華亭張榮景桓著

男八齡童子兆熊較

題一峰鳳凰山

丹山彩鳳落茸城石上雲生瑞靄盈幾向青天欲引頸  
何年振翮一長鳴

題二峰陸寶山

聞道樓臺傍水開碧溪花落似蓬萊只今二陸俱黃土  
猶有文星映上台

題三峰余山

當年虎樹知何處今日猶傳大小青野老侈談陳處士  
頑仙廬畔雨冥冥



題四峰細林山

梧桐引月碧窗孤上帝天仙事有無今日洞門雲起處  
曉鐘敲斷夜啼烏

題五峰薛山

玉屏遙映白雲秋一水清泠浴素鷗兩岸野花看不厭  
月明留得櫓聲柔

題六峰機山

雲鎖平原落日空陸家入洛謾英雄枉教黃犬傳消息  
辜負鵬搏背大風

題七峰橫山

橫雲松竹鬱叅差龍洞崩頽石不支日落西山月初上

好聽才鬼夜吟詩

題八峰天馬山

天馬行空迥絕塵鞭梢敲斷楚江濱勝遊何處堪稱最  
一道褰腰共踏春

題九峰崑山

崑崙分派小山傳驅石東來那記年松樹不歸華表鶴  
豐碑空鎖夕陽煙

答贈王雲山原韻

梅花原上檢遺編義利分途辨萬千識得孔顏獨樂處  
此心端不爲情遷

月落空林啼夜烏世風日下似江河羨君把卷西軒下



高臥煙霞發浩歌  
拂雲修竹映鴻文  
亮節尤堪對此君  
捧讀一編居易錄  
片言支解盡應焚  
後輩儀型凜四輕  
說詩不讓鄭康成  
端居丈室研心性  
拂我春風倍有情  
自愧霜毛種種新  
神仙幾見海揚塵  
甘心尋得逃名地  
箬笠蓑衣作散人

答贈顧良哉

瓊瑤投我筆如椽  
理窟才情世共傳  
瓦釜亂鳴聲價重  
黃鐘埋沒沒有誰  
憐獻策金門路萬千  
十年空泛孝廉船  
他時定有張雷鑑

高跨虹蜺直上天

贈徐諤一

相門詩禮傳家舊  
澤及文孫品更高  
一代詞壇推作手  
丹山盡展鳳凰毛

贈陳潛人

海天日落紫雲開  
燦爛文光燭九陔  
聖主求賢虛左  
席會須騎鶴上蓬萊

贈蔣詒久

九萬搏來六翮成  
青天背負眼分明  
怪他雙燕花間坐  
枉自呢喃作好聲

遣懷



空明子詩集卷之五  
三  
弄簧鶯舌若爲情  
裘馬街頭逐隊行  
獨我暮年蕭瑟甚  
更無詞賦敵蘭成

昨宵

昨宵小閣一燈紅  
一曲清歌曲未終  
忽報打窗風雨急  
推窗又見月朦朧

贈盛鼎彝

敏妙臨文如鳳躍  
羨他年少便知名  
佇看得占魏科蚤  
豈必龍頭讓老成

題亡友藥欄

主人老去花枝瘦  
朶朶垂頭怨落紅  
錦帳重重簫管盛  
讓他別院醉東風

過龍華古寺

髫年曾向此間遊  
今日相看五十秋  
莫道白頭吟興減  
短篇先寄藏經樓

記夢

月明雲淡海天遙  
誤入天台度石橋  
惆悵舊時人不見  
磬聲空自出僧寮

山僧

老僧枯坐已多年  
萍水相逢意惘然  
居士本來門外漢  
口頭不解野狐禪

歸田後有事公庭  
過蒙優禮作此志  
謝兼以自嘲  
歸來教子樂餘生  
豈敢堦前通姓名  
今日相逢殊意外



定教官笑我無情  
從來寵辱莫須驚  
天意分明要玉成  
不遇中山反噬酷  
安能府史盡知名

去年五月鵬集承塵  
今忽聞鵬化作此志感

去年我見汝猶憐  
何至心同不繫船  
一事無成今竟歿  
白頭依舊老青氈

十字變體小迴文詩

軒西隔浦近前村  
浦近前村曉斷魂  
魂斷曉村前近浦  
村前近浦隔西軒  
梅殘落月印香苔  
月印香苔綠逕開  
開逕綠苔香印月  
苔香印月落殘梅

過朱買臣墓

買臣貧賤妻求去  
羞殺人間小丈夫  
一个寡妻存不得  
漫攜金印鎮東吳

煙雨樓憶舊

鴛鴦湖畔好停舟  
煙雨樓前續舊遊  
曾與故人樓上坐  
冷風隱隱襲輕裘

蚤發鴛湖

南湖蚤挂片帆風  
東望穿窗一點紅  
蕩漾水光接霄漢  
畫船西去莫怱怱

石門道中

閉門謝客莫相探  
蚤婦連朝不脫簪  
共道三眠猶未足



吏人蚤已稅新蠶

西湖

桃柳重栽春色酣蘇公隄上遠來探四山合抱人間有  
絕少中心水一潭

十錦塘

樂天詞賦重當時十錦塘邊舞柘枝  
一奩明鏡照蛾眉

孤山

孤山南望水連天子鶴妻梅弔晉賢攜手西泠橋上立  
岳王墓木起雲煙

紫霞山

丁仙洞口草連綿獨我相探結勝緣丹鼎無人荒寂寂  
玲瓏怪石鎖晴煙

山行作

無拘竊喜此身輕有子同遊樂太平一路看花三百里  
清和天氣况初晴

飛來峰

飛來峰下玉玲瓏盡日相看興不窮看到元僧穿鑿處  
反輸頑石鬱葱葱

懷述堂郭老師

蚤飲香名幾十年聚徒講學手殘編門標通德人爭仰  
豈獨儒林識鄭玄



媿予三載結交新如坐春風若飲醇我道干城今有屬  
揆天詞藻奪前民

逆風

畫船西去遇西風及至歸來又轉東寄語封姨莫作惡  
須知主宰是天公

曉吟

舟行不覺日遲遲曉起埋頭便做詩好景可憐天各與  
野花空自弄妖姿

歸舟

微風微雨草萋萋一任前邨鷄亂啼蠶事正忙農事起  
好留佳景作新題

价人趙先生由南宮廣文改授婁村少尹爲作東

籬詩贈之

東籬把菊陶元亮千古風流第一人何意東陽趙司訓  
高懷直欲壓前民

通經奪席有誰倫桃李成陰雨露新 聖主求賢方若  
渴栽培已過十餘春

解組何曾嘆積薪東籬依舊醉花茵誰知不許東山臥  
且與光庭續後塵

即景

纔過春分日正長小齋花影照斜陽  
衝破龍涎一縷香



同兒子兆熊訪隱君湘九顧先生  
輕煙一點出孤邨零落殘梅獨閉門書卷半牀高士臥  
不容車馬破苔痕

江上

江上誰家度玉簫暮雲西望路迢迢斜塘在在皆新綠  
一片春光鎖斷橋  
隔池柳線弄輕柔恣意東風卒未休梅興漸闌春正好  
碧桃花下引漁舟

閒步

野草紛紛盡吐香引兒隨意踏芳塘東風無力吹楊柳  
一任春來顛倒狂

賦得鶯到垂楊不惜聲

楊柳垂條弄日晴新鶯巧轉午風輕怪他何故多情思  
叫盡斜陽不住聲

聽鶯

鶯聲淫豔似西崑軟語柔腸總斷魂滿眼繁華春色麗  
綠楊啼罷易黃昏

以志感

一春陰雨臥病無旬愁緒盈握對景悵然故作此  
半春風雨暗江城一值晴和百媚生老病不知門外事  
任他桃李各敷榮

和蔡景正紅梅韻



水姿玉骨醉微醺色借丹砂迥絕羣恰似媚娘追舊愛  
殷勤捧出石榴裙

一夢羅浮帶宿醺紅羅亭畔獨超羣共看紫府胭脂雪  
染遍羊欣白練裙

任他百卉醉醺醺孕雪孤標本不羣何事江妃仙去後  
豔粧飛動赤珠裙

世外佳人酒半醺櫻唇茜袖有誰羣怪他紅淚拋成顆  
濕盡瀟湘六幅裙

再題紅梅一絕句

索笑巡簷事已非冷香吟罷日沉西可憐衣紫塗朱後  
不稱去聲孤山處士妻

僕本恨人無從寫恨回憶從前數子各書一絕聊  
將鄙俚可笑之詞用舒憤懣不平之氣而已

猾吏吟詩

猾吏狂吟數首詩莫論好歹與妍媸若教樹幟文壇裏  
恐被旁人笑色絲

老猿乞食

老猿覓菓樹梢頭乞丐牽來總覺羞扮盡衣冠好腳色  
舊愁仍要接新愁

作孽戕生

胸藏矛戟口如鑼要做人間小阿哥嘔出心肝無別事  
思量不爲讀書多



癡人講學

小梁山畔不須猜豈有能文襪線才鬼語妖言迷本性  
孟婆湯店爲君開

贅孫狼籍

贅入豪門冒姓強竊來黃白滿空囊可憐後代成狼狽  
珍重閨中窈窕娘

浪子拋家

穿花覓柳尋常事撞食幫閒半世忙  
歿後一靈終寂寞尚遺家累送韓香

幫閒得計

謀生何必走天涯  
弄熟孤兒勝似爺  
夜半燒香禮星斗

此身多賴小東家

奕葉相仍

承先啓後逞豪強  
奕葉相傳勢益張  
天網恢恢終不漏  
回頭及蚤好商量

逆子賣父

爲人須要分涇渭  
恩怨糊塗最不才  
先世有靈應痛恨  
爾何面目到泉臺

中山的派

中山後裔推真派  
客死他鄉萬事空  
何待十年成敗局  
漸看華屋哭秋風

狼子野心



骨月參商事已違教猱升木世尤稀不知用盡心多少  
空惹交親說是非

貪夫狗財

貧來無策足營生滿口胡柴似老成今日白楊抽十丈  
妻孥狼籍不勝情

射工伺影

心如毒蠍口如蛇聲似鷓鴣身似蝦兒女不知時勢改  
大言猶自向人誇

歸真

魔境煉完無外道性根叅透識真吾此中獨得空空樂  
莫管人間觚不觚

橫雲書所見

梅花折得一枝新窈窕禪房臥美人不比紅蓮來竹院  
老僧要識洞中春

聽鶯

落花風急無旬雨四面青山送好春但得隔林鶯一囀  
飽看新綠不愁貧

七十口號

生逢世祖方全盛長養先皇六十春今上六年  
交七十一生長作太平人

山莊

山莊徑僻少行人德福橋邊春漲新日落昏黃鳥雀噪



墓門高照月如銀


靜坐

疎籬低亞露葵傾  
好女開花似送迎  
燕子不來雞犬靜  
紫茸一盞足餘生

空明子詩集卷之六

華亭張榮景桓著

男八齡童子



贈上洋唐廷一

憶別經三載  
高文世共傳  
金山兼玉海  
白髮老青氈  
棣萼連枝秀  
春風入座妍  
典型應有屬  
取法在前賢

答贈陸孝毅

一世佳公子  
臨文老更遒  
靜觀香沼晚  
淡看碧雲秋  
傲骨凌蒼檜  
閒情寄素鷗  
琳琅投贈句  
百尺最高樓

答贈姚平山

料得吟窗下  
時時夜夢花  
詩成滿案玉  
賦就一天霞  
自料得吟窗  
下時時夜夢  
花詩成滿案  
玉賦就一天  
霞自有驚人  
處何須待我  
誇天梯應不  
遠隨意入東  
華





原件短缺

P2



空明子詩集卷之六  
答贈錫山志萬揚生

已亥仲冬月爾年一十時論文我獨許握管盡稱奇嗣  
復誇重見童烏信不疑阿熊今八歲努力好這隨

答贈平原陸石公

二陸光文燄雲間世澤綿只看老碩彥猶遡舊平泉

平泉

文定公諱樹聲別號貌古人如玉才雄詩若仙高山空仰止明喪

有誰憐

先生止一子六十外遭喪明之痛故云

答贈海上唐宸枚

戶滿遊楊屐芝蘭更鬱葱方期娛晚景誰料動哀衷

先生

令子掄三纂修告成授職有日不料一病而七故云

急雨遮明月狂風捲落紅此時腸斷處燈暗小樓中

孝友傳家舊詩書貽澤長十年經刻苦六翮待翱翔思  
以空靈出名因韜晦藏不須愁淹沒 聃主正當陽

贈念哉周生

名孫錦

勵志經寒暑英年駿有聲才情推勁敵理窟破堅城家  
學光逾燄文名晚更成岐山高在望聽爾鳳凰鳴

贈陸宐士

一瞬不容忽光陰那復來草因春雨長門對晚江開樹  
德寧無謗立言容有猜只餘一寸地磨洗絕氛埃

述懷

名理原無晦心田貴自耕景光分晝夜日月見陰晴莫  
使靈臺昧徒爲暗地行呼童急秉燭還我舊光明



與兆熊戲語

閒窗偶對鏡鬚髮總成絲荆樹枯全盡嚶聲響復遲無  
成悲老大有子惜鞭笞先達多延譽崢嶸或可期

閒行

春老葉初盛桐陰日轉長有書堪下酒無蝶不尋芳舊  
曲翻新譜流鶯鼓嫩簧閒行多別趣花露濕衣裳

草堂

我愛草堂靜幽閒遠市塵未堪稱地主常許接天民詩  
以清逾古交因淡更親小樓寄遐矚盈滿太和春  
我愛草堂靜秦松好讀書清風拂戶牖明月照庭除草  
漸萌芽長花當蓓蕾初遲遲遇春日小圃及時鋤

學道

日月何所附乾坤自有根千秋隨變化一炁達朝昏大  
德寧容測同原莫可捫誰能叅此理衆妙啓重門

書所見

古栢移晴影新茅沒燒痕花從山外見鳥向竹邊喧雲  
過高軒暗潮生小港渾歸來天欲暮寂寂掩重門

獨坐

雨餘芳草綠又喜竹生孫春煖鶯調舌隄傾柳見根雞  
鳴來對岸犬吠隔前邨何日良朋至新苔破碧痕

登小橫山

仄徑探孤嶽攜筇傍碧潯交陰深蔽日聒耳亂鳴禽卻



空明子言集卷之六  
四  
恐寒飈至還愁濕霧侵  
登高聊極目松籟發清音  
帘影弄東風參差見落紅  
鶯聲桃柳合鶴唳海天空  
笑語通花逕松筠護梵宮  
下山尋舊路新月印歸鴻

牡丹

獨立一枝低  
嫣然小閣西  
淡妝疑罷舞  
濃露似嬌啼  
鶯轉誰爲和  
蜂吟態不迷  
晚香迎皓月  
繡襪濕青泥

渡海

風急入黃昏  
扁舟渡海門  
濕烟迷隔浦  
寒雨暗孤村  
越燕翻空落  
江狔逐浪奔  
聞雞誰起舞  
端的愧劉琨

煙雨樓

古木散晴煙  
危樓聳碧天  
臺荒傳勝跡  
鶯老數流年  
逸

士酌三雅才人賦百篇  
誰能對此景不被暮愁牽

過塘西鎮

煙火遠相望  
民居似鴈行  
一帆高下樹  
半里淺深廊  
老寺當門井  
空江夾岸桑  
午風天乍暖  
倚枕醉紅芳

過松老橋作

高山已在望  
前路想無多  
十載翱游地  
三夏歛乃歌  
煙濃松若沐  
風細柳生波  
會訪林深處  
因緣問鳥窠

杭關夜泊

舟泛越江邊  
時時手一編  
有山閒指點  
得月漫周旋  
計里經三百  
攜尊少十千  
紫陽深洞裏  
好去謁丁僊

昭慶寺



經過寶叔塔昭慶特相尋戒律消塵念莊嚴啓道心  
鐘聲和嶠遠梵唱入雲深花雨頻頻下輕煙繞碧潯

古大佛寺

古來大佛寺俯瞰段家橋寶殿嗟零落金容嘆寂寥  
鷗飛當檻過犬吠隔山遙瞻仰經時立行行泛小船

紫陽洞天訪丁野鶴肉身

野鶴何由見攜筇到紫陽煙深雲竇鎖池淺月波藏  
丹竈疑留火仙軀似帶香玲瓏多怪石橋畔覓瓊漿

歸途

下山不數武風急雨猖狂只恐籃輿窄還愁道里長  
密雲沉極浦微日照空廊莫笑歸來晚西窗月有光

對景

日出千山紫煙消萬壑清淺沙明宿鷺喬木暗孤城  
寄託心無定浮沉夢屢更莫愁頭白盡耕鑿遂初盟

紙鳶

紙鳶乘日暮一線任風牽待月明燈火隨時奏管絃  
鷓飛常退後鵬奮孰爭先仗彼東君力何愁不戾天

自嘲

酒力年年減童心日日增偷閒師野鶴貪懶學山僧  
課子期無忝持躬愧未能消殘稽古興請益負良朋

泛舟余山之麓同老友三四人策杖行吟訪古沐

山登 堂禪師漫賦



山磬一聲響輕雲天外飛柳絲牽畫舫花片點春衣酌  
酒酬紅藥題詩坐翠微竹深多古剎爲叩遠公扉

啜茗

煮茗煎榆火名泉性帶寒一杯聯舊愛七碗結新歡蟹  
眼聲偏細龍團味獨完餘香散幽閣清韻比芳蘭

登一覽樓作

麗日開晴甸危樓敞遠天井歆鰻不見樹老杏空傳竹  
木交春茂雲霞映水妍瑞光明寶像鐘鼓護祥煙

和章鳴岡一覽樓韻

一覽真空絕樓從空處名雲迷春浦綠煙鎖曉山青不  
作繁華想那知車馬聲午齋聞梵唱鶯燕爲誰鳴

丁未除夕示兆熊

髫齡真好學除夕肯埋頭八載無停晷三餘謝浪遊摛  
詞須百鍊勵志貴千秋莫學時流輩徒誇不下樓

戊申春日示從孫若水

夔爾從孫子英年擁百城書能融意讀文肯細心行典  
雅稱淵博高華見老成慎毋中道立徒事竊浮名

南映大姪好義急公樂輸河工正用 皇上嘉納  
特賜京堂太僕寺少卿職銜以示 恩寵作此

志喜

兩世 君恩重 新恩覺更隆捐埃慚莫報 賜職愧  
無功望 闕惟知感披誠願効忠四時調玉燭宇宙自



和融

空明子詩集卷之六

空明子詩集卷之七

華亭張榮景桓著

男八齡童子兆熊較

一庚子秋日懷樸村大兄

廣庭花滿一窗紅  
日夕相思寤寐通  
六載修明勞  
睿眷半生著述奪天工  
蘭芽初茁當遲日  
玉樹呈祥任好風  
知有鳳毛堪濟美  
蚤看光燄氣如虹

答和吳客仙原韻五章

吳客仙者名鈞崇之奇士也  
一生學道至性過人  
半椽鮮有借館為家  
恒產全無聚徒作佃  
或酣歌於溪畔  
或痛哭於田間  
崇人不察非目之  
為酒癖  
即名之為詩狂  
噫彼悠悠者  
烏足以知



客仙哉附識於此

踏遍金鰲背上峰  
澹雲籠月綠陰濃  
空明似接蓬萊路  
浩蕩宜爲江漢宗  
不見十洲浮巨壑  
但聞一鶴集喬松  
高標實與凡禽異  
緱嶺丹山任適從  
鶯花易辦詩千首  
塊壘難消酒百尊  
直以三生等夢泡  
漫將一笑寄乾坤  
名心淡似陶元亮  
賦手高於劉後村  
明發有懷常不寐  
敝衣襟袖滿啼痕  
半生淪落獨何與  
問世常迴列子車  
共仰棲梧來鳳鳥  
忽驚避釣走鰲魚  
但餘秃筆耕長畝  
刺有高風敵太虛  
窮到一椽嗟莫有  
和陶敢曰愛吾廬  
擔簦負笈送歸鴻  
戀別情深淚欲紅  
三世冰心同皎月

一衿傲骨獨清風  
旣無長物應憎盜  
鮮有微疵合省躬

坐到夜分談更劇  
茶煙搖曳燭花中

客仙祖母嫡母生  
母及女俱已旌節

解組歸來撤絳帷  
二疏風致豈能追  
恒嗤狡兔營三窟  
每鄙靈烏借一枝  
情重友生心繾綣  
書傳魚雁路倭遲  
回思話別江干日  
楊柳新描淺黛着

辛丑春蒙署提憲 陳公先施作此致謝

轅門旗鼓日喧喧  
保障東南體自尊  
豈合寒儒叨異數  
漫勞上將枉高軒  
候門少有童三尺  
開徑空餘土一垣  
此日此情忘不得  
自慚俯仰獨沾恩

答和朱畊方原韻

銜盃細語讀書堂  
未許干將劍露芒  
一笑花枝春寂寂



半陰天氣濕茫茫要知牛馬皆成癘須識鳶魚亦是狂  
堪嘆世人俱逐臭問君何愛紫茸香

此日答和徐諤一原韻

織就天孫雲錦裳麗詞應勝段文昌何期彩鳳來高閣  
忽訝新鶯度短牆照夜明珠有媚辟塵塵遠玉生光  
君才超絕誰能敵豈比人間有寸長  
漫遡先朝玉旨溫金貂奕葉位長尊曾聞片語除奸黨  
又見全忠出相門今日箕裘惟爾紹昔年勲業有誰論  
相看意氣高千尺雲夢應知八九吞

答和陳潛人原韻

恐隊斯文隻手擎漫勞覃思復研精行藏未敢期相許

寵辱由來自不驚七字君堪推巨擘五言誰復擅長城  
廉頗一飯三遺矢棄甲還宜更曳兵

閏六月初六日送鎮臺 陳公回崇攜兆熊同往

極蒙優禮書此以志不忘

歸鎮東瀛車馬喧漫攜稚子問寒溫衣冠未與成人列  
揖讓徒叨開府恩幾片旌旗搖白日一編書卷動黃昏  
輕裘緩帶今重見目送雲帆過海門

鎮臺陳公榮在官時極荷殊恩告歸之後公因署  
提憲至松又承先施晉謁之日命開中門併着  
臺役翼之而進後堂接見情意彌渥未幾送別  
禮貌尤隆榮小儒也何克當此今老矣不知何



空明子詩集卷之七  
三  
日得報大德謹記之使我子孫弗忘洪恩可也  
小儒慚愧當殊禮大將殷勤賜盛筵玉笋滿斟傾座上  
筭輿羣翼到堦前望光必使中門入送別還教小艇先  
如此撝謙今古罕感恩無任祝遙天

上大中丞吳公

步禱瑤壇屏絳騶勞心方代 聖明憂香焚金鼎祥光  
現帝眷丹誠膏雨流四國黍苗看翼翼一朝黎庶樂悠  
悠回天再造東南福壽算應綿八百秋

上大方伯李公

名高李絳掌司農分鎮東南比屋封出入未嘗貽怠緩  
公私蚤已辦從容屏藩 帝室功勳大筦鑰軍儲職事

重今日旬宣來召虎捐征去 蚤追蹤

上江寧太叅王公

轉輸飛輓建嘉謨報國丹心仰大夫刁斗不煩勞戍卒  
稻梁無事達 皇都置倉省運勤尤著發粟周饑澤誕  
敷莫謂連年頻亢旱東南民力賴君蘇

懷蘇郡家司馬梅崖公祖

三年不上庾公樓尊酒談心憶舊遊每羨沈羲升碧落  
獨慚伯樂識驊騮白駒過隙情難遂黃雀銜環志未酬  
大德正宜膺 聖眷紫鸞飛動彩雲流

江右劉直响先生讀書飽道富有文章十上公車  
屢得復失來宰嘉邑恤士愛民未幾解任萬姓



攀轅而先生視一官猶敝屣也謬聞輿論枉道  
來松投我瓊瑤霏霏玉屑不勝雅愛依韻奉酬  
十五傳經尊所聞索居從不嘆離羣偶遊海外尋黃石  
旋返山中臥白雲練水神君多異政廬陵碩彥有奇文  
何當枉玉衡門下不覺傾心仰止殷  
得瞻耆宇勝於聞捧讀瑤章迥絕羣寶劍發光長接漢  
彩虹吐氣總凌雲萊蕪清操塵生甑彭澤高風篋有文  
雖則棄官同敝屣毋談民瘼念還殷

和汪偉人七十自壽原韻

騷壇時見聳吟肩七十爭誇似少年衣帛未能殊悵絕  
杖鳩不必轉陶然招朋對月眠雲竇得酒尋花醉洞天  
最愛晚山堪寄傲奈他垂柳隔溪煙  
汪洋三泖漾清流移得家來二十秋蠻觸笑他爭勝負  
丹鉛於我任誅求屋邊穩睡師黃犢沙上忘機傲白鷗  
獻賦幾回成一夢廿年屢敝黑貂裘

壬寅歲朝徐諤一擬康熙六十一年元旦蚤朝詩

一章見示誠為亘古盛事因亦擬二章以志喜  
庭燎薰天魏闕幽 御香浮動五雲樓春秋正盛當元  
日甲子重添又一籌柳待好風舒禁苑花迎淑氣滿皇  
州太平何以酬 明主願沛恩膏四海流  
春殿輝煌日漸長暖風拂拂襲冠裳千官魚貫趨 丹  
陛萬國鸞封滿 御床共慶河山誠鞏固羣歌曆數果



空明子言集卷之十一  
馮古浦作詩索閱拙稿卽用其原韻答之  
遐昌稱觴好進岡陵祝玉燭長調照八方

端嚴愧乏前民範淺躁羞爲後學師豈有雲霞輝日彩  
但餘松柏傲霜姿思君地隔如千里求友心同在一時  
魚目未投珠已換開函先喜讀君詞

戲答蔣詒久

白露初零秋正中桂蘭堂畔一尊紅閒房影弄梧桐月  
小閣晴開楊柳風舌本帶芳飄玉屑墨花飛藻奪天工  
待君築就長城日聊以備師取次攻

寄崇川陸生

名大經

自從瀛海爲師後知爾生平最愛詩七步吟成誇俊句

八叉賦就譜妍辭玄亭問字無多日絳帳談心又幾時  
有暇卽來重聚首不妨長避庾元規

答贈上洋潘韓章

半生多病少周旋百里遙看似各天惠我佳章同獲寶  
報君拙句類拋磚老身恰值懸車日孺子初交總角年  
承譽瞢童知有愧相期問字到亭前

答贈童瑩川

春申江水接吳松猶是吳王舊五茸一面未交先有贈  
五言遙寄若爲容新知飛到三更雨老句吟殘半夜鐘  
何日扁舟同把釣泖湖煙月好追蹤

上郡侯周祖臺



空明子詩集卷之二  
畫戟朱幡佩玉珂隨車甘雨潤嘉禾共看合浦珠還郡  
又見弘農虎渡河惠露沾濡回造化仁風披拂養天和  
政成指日膺殊錫 鳳詔遙臨瑞靄多

答贈王西亭給諫先生

赤心報國本平生得子旋歸世共驚雛產丹山稱繼美  
玉生藍圃擬連城文當變化標奇格詩到和平近正聲  
回想 禁垣騎白馬彈章諫草舊知名

贈華邑周父母

親瞻下里被絃歌又見仁風扇太和朽木喜沾新雨露  
祥雲還護舊焯波趨時未肯同鄉愿忤俗殊堪愧女蘿  
戀戀故交誰得似世情何地不干戈

答贈孫思九

主盟壇坫蚤稱雄賦我瓊瑤迥不同共仰絕塵空冀北  
何爲守鈍老牆東青溪便作逃名地白首羣推玩世翁  
慚愧阿熊蒙過獎幾時展翅試剛風

壽節母某氏

錦障新開壽母筵蘭蓀初試舞衣鮮金尊滿泛千年醞  
玉井高擎十丈蓮椿樹蚤凋南嶺上萱花長茂北堂前  
由來節操標彤管佇看芳名到日邊

挽扶風君

百年我亦未經過嘆汝無端隨孽河愁到盡頭那得減  
夢當好處幾曾多拔釵沽酒供賓宴教子吟詩帶病歌



今日總帷空寂寂傷心難返魯陽戈

贈許母張節婦

茹蘖含酸三十年就中辛苦有誰憐  
養親竭力供甘旨訓子堅心法聖賢  
曉樹不聽鶯共語夜牀應似鶴孤眠  
採風正欲光潛德會見鸞書下九天

答贈錢塘王介翁

名延年

快從冰署接風流鏖戰名場二十秋  
詩史千年追李杜文壇一席繼韓歐  
烏衣舊族由來貴白鳳新篇孰與儔  
犬子豈能當溢美老人藉以慰窮愁

祝郡侯周祖臺壽

共沐陽春萬象融恩同時雨德同風  
燭奸義至通民隱解網情深答上穹  
今日稱觴頭正黑明年秉鉞氣如虹  
羣黎競進岡陵祝五福駢臻遍海東

贈山陰胡無波

喜因玉潤識冰清誰料胸中富甲兵  
古道照來如嶽峙新詩寫去若雷轟  
曾從官署談心曲又接荒齋話俗情  
莫慮暮年遲得子定教旦晚毓寧馨

送郭景文北歸

凍雲漠漠鎖寒烟得託金蘭憶往年  
不惜舌耕三鼓後尚餘詩話五更前  
依劉念切徐增感御李情深益自憐  
從此一帆江北去各天風雨暗凄然

謝郡侯周祖臺



空明子言集卷之七  
杜門謝客轉悠然日夕徒知手一編自問餘生誠有愧  
流言散布益增愆曾參尚有投梭日卞氏應遭泣玉年  
何幸得逢廉叔度撥開雲霧見青天

自題小照

病入膏肓勢不支任他盧扁也攢着人中愚拙無如我  
世上癡頑更有誰一盞冷淘稱莫逆半間冰窖合相知  
般般犯盡酸寒態惟剩趨時數首詩

挽崇川孝廉鈕星濤

諱滄

天遙雲斷雁聲哀極目文星隕夜臺一束生芻猶未致  
數篇蒿里卽爲裁心耽著述空珠玉鴉啄庭除破蘚苔  
不遇孫陽誰識得可憐錦繡總成灰

癸卯上元後五日值顧湘九同朱初晴昆季枉顧  
談及先君東臯公暨先兄曼園公六十年前交  
好舊誼因念湘九年近九十精神益壯榮止六  
十有五竟頽然若老翁矣感而賦此

思量六十五年前我父吾兄盡少年豈料衰頽臨到僕  
那能強壯得如仙養親不及恩沾祿教子惟餘硯有田  
多謝故交長聚首任他白髮滿三千

副總戎尙公三韓人也係尙籓幼子榮到崇日公  
正署崇鎮事相見時過蒙青盼未幾移鎮浙之  
象山榮歸里後聞又調至江陰自己亥夏至癸  
卯夏四載內雖遷徙靡定而職不加顯今當



聖君繼統行將有不次之擢矣跂予望之

話別崇沙柳弄煙渡頭分手兩淒然行踪遷徙經三轉  
官職浮沉又四年今日新君多特簡舊時名將定高  
騫行當撥棹尋江滸相送飛鴻上九天

贈邑侯劉公

楷模南國繼韓歐望重烹鮮試大猷湘水三年留政績  
婁村四境起歌謳干枝着露花當縣雙穗迎風麥正秋  
何幸阿熊蒙拂拭福星高照五雲浮

答贈長洲朱公季

長洲自昔才人數共道詞華獨數君寄到一篇香似醴  
飲來三日齒猶芬身衰不復常開卷兒幼寧能便洽聞

承譽星辰作爾子未知何日煥龍文

悼河臺陳公

河運難通來去路大臣憔悴小臣憂惟餘荒草堪藏鷺  
空有垂楊莫繫舟誰秉國均施善策好教漕艇得安流  
年來水利頻頻講長使賢豪白盡頭

陳含美先生諱言章高風亮節不可一世寄情詩

酒放浪形骸三十喪偶終身不娶雖中郎之有  
女痛伯道之無兒其歿也莖於佘山之麓予仝  
戴婿晴江往送親友無一至者吁可慨也已

酸風悲捲綠楊煙相送文星莖九泉友誼三杯誰繾綣  
親情一陌少周旋中郎有女差堪慰伯道無兒實可憐



腸斷數聲歌薤露片雲黯澹蔚藍天

題周復周兩尊人行狀後兼示其令子念哉

君因考妣湖高曾出谷遷喬幾廢興鑿術百年綿舊業

儒冠三世續殘燈君於孟陽公為三世孫故云一門孝友人爭羨尊人

點菴公素稱孝友中饋雍容里共稱尊慈王孺人向稱賢淑今日鳳毛重

振起令子念哉文行素優今已遊庠文壇奪幟看先登

四月六日華亭周父母賜小兒兆熊端溪硯中書

君及餘物數種作此代謝

製錦無私頌二天大邦端賴有名賢滿城桃李逢春盛

合邑桑麻得露妍觀德賜來懷君子東坡銘端溪硯云懿矣茲石君子之

側匪以玩物惟以觀德生花握後憶詩仙童心何日開茅塞喜託

龍門好着鞭

端陽前一日婁邑劉父母賜小兒兆熊筆墨衣帽

靴帶及佳菓等物作此代謝

冠履衣裳色色全賜來着罷若登仙一條錦帶如圍玉

十管青鏤待補天菓美自同膏澤渥麝芬應共墨花鮮

春風披拂沾時雨山斗鴻名仰大賢

答贈虬江王斗初名世樞

長天五色爛雲霞散入鴻軒鳳舉家玉管烏絲傳錦繡

銀鈎鐵畫走龍蛇造樓直欲凌韓洎鍊石尤能勝女媧

稚子敢勞華袞贈想君時夢筆生花

答贈表姪周軒三



九苞未展煥滄瀛月露連篇駿有聲笑指騷壇誇獨步  
力將文壘作長城八叉賦就驚奇創三折揮來見老成  
深愧佳章名父子那能公果不慚卿

上浙江李大中丞祖臺

惠政沾吳已數年好風今送越江邊荷花紅逼雷峰日  
桂子香通柳浪烟刁斗不驚潛小醜堂簾無事樂豐年  
公餘重把西湖詠肯讓前賢白樂天

奉寄浙江大叅家梅崖公祖

共仰雙旌泛畫船望侔屏翰佐藩宣吳邦在昔栽培厚  
越國從今雨露偏兩穗民歌懷大德三天眷慶華年  
佇看膏澤流千里帝識鴻名歲九遷

孟秋七日蒙大都督

高憲祖臺台東下頒作此

奉謝

建牙秉節鎮南州碩德今看第一流帝簡重臣承

帝眷天生元老荷天休借籌已見多長算公署任兩江制府時肅清

吏治萬姓俱被其澤專闡爭推克壯猷公在松三載兵民相安號

盡厥職使海疆晏然皆公之功也但恐鹽梅應蚤卜寇公何計得攀留

送昊霑四姪入都會試

江東門第莫須論極盛難為續後塵但要名成何懼晚  
須知冬盡必逢春立身莫負先君澤得志休忘故我貧  
癡叔不堪徒潦倒阿熊年幼未如人

訓兆熊



訓爾辛勤誦五經夜深朗朗莫須停多時笑語長同席  
盡日追陪免過庭正史數編堪爛熟寸心一點要空靈  
他年休爲名和利奔走塵埃變本形

憶辛丑歲於姑蘇半塘同兆熊訪永照大師

往年繫纜古長洲曾共山僧汗漫遊荒寺冷烟當落照  
枯了老樹幾經秋觀心我悟無生訣說相兒丁隔歲憂  
兆熊隔歲  
果丁母憂何日扁舟重鼓棹一龕燈火問前修

壽印省齋七十兼似令嗣賡鹿脯昌

仙居跨海接蓬萊翠栢蒼松繞逕栽棗獻安期雲外見  
桃偷方朔日邊來冰輪光泛烏皮几桂醕香浮碧玉杯  
引得仙翁開口笑鳳毛麟趾滿瑤臺

答贈閩中道臺韓公卽用原韻

佳章頒賜置郵傳捧讀瓊瑤已隔年入手共驚香馥馥  
服膺遙感意拳拳德心共道明於鏡風度原知態似仙  
今日拜嘉真有幸何時投轄醉張顛

副總戎冉公陞任來松未及致賀反承先施作此

志感

憶從解組歸田後幾度江頭望海天多病自應埋草徑  
不才安敢謁樓船豈知遷轉官階日還念龍鍾笑語年  
車馬喧喧來陋巷漫攜稚子一周旋

奉贈金山衛副總戎冉公

銀山捲浪接朝昏極目煙波到海門異地苗蠻皆効順



專城鼓角獨稱尊共欽強弩輕車畧不數裁金挾纊恩  
壯志凌雲誰得似高懷直欲壓劉琨

懷崇川鎮臺陳公

坐鎮孤城瀛海環伏波門第老征蠻飲醇共道應名祐  
投筆爭稱合姓班刁斗夜嚴連震澤旌旗日麗接狼山  
追陪兩載蒙青盼欲報無由只汗顏

奉贈華亭周公

三年政績究如何物阜民安樂太和雨潤露滋偏失澤  
風恬日煖卻生波誰人不望雙鳧影指刻重興五袴歌  
深喜 聒聰無弗屈肯令召父臥爐蘿

呈司馬俞公祖

柘林南去石塘環司馬分猷駐此間度量似河兼似海  
聲名如斗復如山憂民已著三年績報 主寧貪片刻  
閒共仰鳳毛都蔚起漢時萬石合追攀

贈奉賢父母張公

玉壺冰署絕纖塵 帝簡名賢令海濱印鎖訟庭非愛  
懶風清竹閣豈愁貧桑麻待澤沾時雨桃李無言度好  
春佇看政成來 鳳詔紫泥長護五雲頻

繆虞臯作蟬聯韻五章以寫愁悶讀之淒然有感  
作此慰之

梁孟和諧度好春齊省舉案出風塵穿簾紫燕情何重  
織柳黃鸝語更親五字長城堪獨任萬言奇策合先陳



桂花香滿秦淮路江左驚看第一人

廿年甘苦共何人半百纔過又一春  
搜篋典衣供上客  
拔釵沽酒奉清塵  
經時對鏡愁眉鎖  
盡日攤書笑語親  
聞道椒花能獻頌  
慧心不數潁川陳

野簌焉能錯雜陳  
百年粗糲可憐人  
病眠有恨過三月  
愁坐無端度一春  
窗紙屢穿風入骨  
爨烟頻斷甑封塵  
年來料得君難寐  
長夜惟餘燈火親

誰是知交誰是親  
太倉有粟自陳陳  
可憐金紫雲霄客  
不念單寒泉石人  
隔歲香醪虛度臘  
新年綵燕可宜春  
何時二豎驅除盡  
重拂窗前几上塵

眼看東海幾揚塵  
立路崎嶇孰可親  
百首詩篇隨意掃  
一腔哀怨向誰陳  
寒帷喜接如賓侶  
展卷欣看跨竈人  
否極泰來應不遠  
放開愁緒待陽春

挽梅花主人姚藥巖廣文

飛鴻堂畔淚沾巾  
只見殘梅不見人  
墨瀋剝香猶帶潤  
筆花餘怒尙含春  
門搖嫩柳青如髮  
瓦點嚴霜白似銀  
共道玉樓今赴召  
可憐受盡廿年貧

嘉定樸邨大兄在顧叙話

帝城遙隔十年春  
幾度思君獨愴神  
得句有誰堪共賞  
論心何處可相親  
望雲渺渺河山遠  
對景茫茫歲月頻  
今日歸來重聚首  
一尊還慶白頭新

聞述堂郭師臺告致歸里有贈



江左文章賴主持斗山聲望足吾師仲淹講道開千古  
伯起明經擅一時涉堽怕逢出柙虎守身甘作處囊錐  
邗溝舊是揚州路月白風清理釣絲

贈維揚郭南江孝廉

名沅

青箱世業著先鞭奪幟文壇近廿年瓊樹蚤華光燦燦  
香名久飲韻翩翩迎親舞綵歡同室別友談心悵各天  
好待春闈鵬奮日鳳城爭羨玉堂僊

上宮傳尚書大都督魏公

清慎勤邀 聖主歡鳳銜丹詔出金鑿舉朝共識尚書  
履半躡爭看上將壇威鎮南蠻驚小醜坐令東海靜狂  
瀾迴思秉鐸瀛洲日不願封侯願識韓

擎天一柱獨稱雄位並元公望轉崇訓士心勞明號令  
愛民情切見幘幪柳營共仰春風綠玉帳常斟醇酒紅  
坐鎮誰能窺鈔算角聲三疊鼓三通

送副總戎冉公之任包山兼有觀荷之訂

春深波浪盪雲煙上將旌旗照海天震澤遠山浮馬蹟  
莫釐古木挂蛟涎輕車韜畧看三捷强弩功名定九遷  
消夏灣頭尋茂叔爲言乘興泛湖船

贈署華亭縣青溪父母張公

一琴一鶴繼前賢訟簡刑清試小鮮官閣有春常帶暖  
露桃得雨益增妍符分青浦經三載箸借華亭有二天  
卓茂功名初發軔鷗鵬變化看蟬聯



拏舟奉送郭述堂師臺歸里

晴江如練潔於銀一片征帆送故人解組好題五柳傳  
葆真初遂百年身平山堂外春風滿文選樓前化雨神  
惆悵今時郭有道誰能捧袂奉清塵

自憐避弋學飛鴻結伴閒尋無是公慕蘭幾回瞻落月  
識韓五載醉薰風白頭羨爾真威鳳青眼慚余類壤蟲  
竊恨阿熊年尙小未能負笈受磨礱

呈郡侯周公祖

重見兒童竹馬迎喧喧鼓吹列雙旌陽春有脚隨車轉  
惠露無私遍地橫皂蓋清風聞四國黃堂明月照三更  
懸知合浦珠還日又擬鸞書出鳳城

予生於順治十六年己亥閏三月初三日至雍正  
五年丁未閏三月初三日交六十九歲實則六  
十有八年矣計中間之閏餘共得二十四月以  
六十八年加上二十四月豈非卒頭七十乎况  
乎又適逢閏上巳誕辰亦人生不易覯之奇遇  
也爰作二章以記之

六旬以外今逢九計閏平頭七十年香案幸陪天上吏  
冶遊願學地行仙簷花歷亂鋪紅錦高柳叅差颺翠煙  
覓得青田成獨醉一鈎新月到窗前  
閏逢上巳經過六不料今春喜更逢囑鯁有兒將舞勺  
搏風無力且歸農蘭亭勝會何妨再洛邑隨波那厭重



遲日欣看多歲月得年豈羨祿千鍾  
贈鷗亭汪太翁

鷗亭先生年過杖國梁孟齊省和氣致祥子孫  
繁衍丁未春曾孫復有美璋之喜五代一堂金  
甌無缺非惟家瑞實朝廷之德化有以致之  
也爰撰數章以志全盛

### 祖德

羣推保障六州功世德綿綿遡上公自昔冠裳真濟美  
到今福祿永來崇型仁講讓傳家範說孝談忠見古風  
五世一堂誠僅事太和元氣久幷幪

### 附喬

深愧絲蘿得附喬登堂晉謁見丰標士林共喜瞻瓊樹  
文燄爭看射斗杓窈窕尋芳扶杖立逍遙望月舉杯邀  
春光披拂王恭柳濯濯風情韻自饒

### 孝親

欲求祿養上書頻鹿鹿名場幾十春無奈數竒偏矢志  
難禁孺慕不傷神斑衣未遂娛親願風木常懷負罪身  
行在孝經人共仰至今贏得鬢如銀

### 友愛

姜肱大被嘆無雙文采風流世所降晝永觀心叅鹿洞  
夜深談易對雞窗十年豹變鵬俱奮百斛龍文鼎獨扛  
想得惠連時入夢池塘佳句滿春江



德配

木公金母下遙天琴瑟調來六十年堂構經營偕相度  
子孫訓迪共周旋只今 寵眷恩偏渥在昔和柔道自  
全膝下曾玄何足異會看七葉盡貂蟬

賢嗣

義方庭訓有誰同鵬背摩天負大風仙掖拾遺追杜老  
琴堂坐理並文翁紫薇省下才如湧寶劍篇中氣似虹  
莫道煙樓容易撞不知難撞是鴻蒙

文孫

文孫奕奕屬文星玉樹芝蘭滿謝庭從事有才堪入幕  
諸生勵志悉通經金環採取知奇特玉燕投來識寧馨

豐角秀眷天分定超宗殊有鳳凰翎

曾孫

桐高百尺發新枝喜見曾孫盡白耆熊夢久知男子吉  
蘭徵尤與淑姬宜八义已奪文壇秀一掃羣驚筆陣奇  
家學淵源知有本不須異地覓師資

元孫

畫堂深處燕雙棲畫漏沉沉日未西孫復弄孫豈易得  
慶三重慶孰能齊高曾座上衣冠古蘭玉庭前笑語低  
珠顆擎來懷抱裏分甘娛目好留題

人瑞

椿萱並茂日欣欣五代團圓罕見聞簪笏千年看繹絡



詩書奕葉羨繽紛衆疑大士來浮世我謂真仙住素雲  
天眷 皇朝永錫類故將人瑞福 明君

鎮臺陳公來松署篆未及數天忽接 特簡浙江

提憲之命作此志賀

慶雲遙集接蓬萊八陣圖成見化裁一代全人推物則  
兩朝元老象昭回純臣不爲身家計 聖主寧忘公輔  
才誰料 九重丹鳳詔蚤隨車轍渡江來

### 七十初度

僕幼多疾病貽累椿萱及長疎狂動而多悔晚  
年一出輒開罪於上官旋反家園愧 君恩之  
未報閉門課子敢詡鳳毛幼學壯行用期幹蠱

### 虛生七十一事無成作此志感

何幸生爲堯舜民布衣疏食率天真兩朝久矣甘蠱螫  
一出徒然愧席珍晚歲共知常帶病壯年自信不如人  
那堪門外花如錦虛度悠悠七十春

童時多病累雙親顧復恩勤倍楚辛寒暖關心五夜漏  
參苓勉力十年春可憐墓木纔成拱空有溪橋接比隣  
幾度鵲鷓原上望暮天寥絕獨傷神

門內相看老更親半生不敢近囂塵清風入室堪爲主  
明月穿簾好作賓豈有文章叅上乘獨尋性命悟前因  
休嗟杖履無行處落落晨星剩幾人

漫攜稚子到湖濱要識當年泗水春童冠與偕成別趣



風雲雖異亦清真笙簧樹底聽黃鳥潑刺波間看素鱗  
此景此情忘不得此生何以答君親

贈春坊志山王先生陳情歸養

從來未見此詞臣真樸誠能繼古人冰操一生惟報  
主清風兩袖足娛親拔尤已著空羣目捧檄常懷舞綵  
身今日板輿欣奉母長筵同祝八千春

空明子詩集卷之八

華亭張榮景桓著

男八齡童子兆熊較

咏五色雲

限用青黃赤白黑藍紅  
紫殷綠碧十一字在內

五色祥雲遍大荒黑於蟬鬢白於霜殷同落日啣山赤  
嫩比垂楊映水黃碧綠並行標異彩青紅相間發奇光  
蔚藍自覺無顏色紫氣徒勞燭斗旁

咏千葉荷花梔子

一名越桃

越菼千瓣吐奇芳名竊蓮花鬪素妝共訝昌宗新傅粉  
卻疑韓壽復偷香水邊林下堪同調玉骨冰肌合斷腸  
茂叔不知曾見否枉教蒼菊號西方

春草



抽青布綠不知名春日迎風倍有情  
芟盡又生人跡罕  
踏殘無恙馬蹄輕經過古道千回曲  
閱遍長亭一片平  
浪蝶尋芳最得意粉衣飄蕩日初晴

梅

疎梅一帶絕纖埃嶺上江邊次第開  
瘦影任風吹不去  
幽香隨月送將來沙鷗樹底應難覓  
海鶴林間竟莫猜  
直待春分漸搖落魚鱗還與點香苔

戲咏風花雪月限七陽韻不許犯本題字面亦不得用本題替身字面并不得借故事夾發俱要白描空寫不卽不離各賦一章以博一粲

簷前玉馬韻悠揚搖動湘簾日正長  
隨意攪翻楊柳浪

有情送到芰荷香花枝零落綠卿妬  
帆影分張爲爾狂  
我住深山宜耐冷未堪冷上復加涼

暖日和風著意忙小齋一夜滿庭芳  
數枝招引狂蜂蝶  
五色迷離繡鳳凰或淺或深增別致  
如嗔如笑帶微香  
遊人莫漫輕攀折枉使閨中欲斷腸

寒雲密鎖一天涼鷗鷺紛紛度朔方  
忽整復斜千種態  
穿簾入幕十分狂萬條玉骨枝枝粉  
滿地冰綃面面牆  
好倩奚奴沽美酒暮樓橫笛醉瓊芳

一庭如雪復如霜牽引晴輝遍八荒  
思婦有情啼小閣  
勞人無寐泣遐方明中直達三千界  
暗處能通一線光  
曾向夜深矯首望幾回完缺照空牀



戲咏風花雪月限一先韻每首要用本題十二字

餘意同上章

好風風捲晚風烟風疾風柔風總妍幾處錦帆追赤電  
有時花片點紅泉每憎微雨緣風厲慣見輕風借雨顛  
我本畏風風蚤避風來風去也徒然

花開花落惜花天打點看花花正妍花態花容真可愛  
花枝花意總堪憐花當帶雨嬌偏勝花到臨風舞更便  
蜂蝶無端休浪採夢花人已醉游仙

踏雪尋芳雪可憐可憐雪態獨僂僂雪飄鷺羽雪逾白  
雪點梅花雪更妍定有風來隨雪舞豈無雪去借風旋  
雪稱瑞雪宜交臘雪白陽春不值錢

皓月高懸月正弦捲簾望月月當天月光正好添花媚  
花貌還須助月妍幾度關山月未上經年湖海月恒圓  
月完月缺俱堪愛月影穿窗月滿川

白秋海棠

一名斷腸草

斷腸芳草帶微霜洗盡紅妝改淡妝清淚有痕啼曉月  
玉容無語背斜陽丹楓山外羞相對黃菊籬邊枉自忙  
恰似浣紗溪畔女西風搖曳綠羅裳

瘵狗

瘵狗猙獰目未經難同齊犬賦令令吠先鷄唱三更黑  
臥共牛眠兩岸青風疾吹來滿座臭雨餘贏得一身腥  
自從逐後無消息不復狺狺到戶庭



惡木

樹木須先桃李枝落材取實兩相宜豈期種棘空遭刺  
誰料澆樗不得炊毒鱗作窠噴黑霧淫狐穿穴逞妖姿  
遮星蔽日成何用應悔栽培心力疲

迴廊

桂堂深處曲廊環招隱無勞賦小山掩戶好看香裊裊  
捲簾時聽鳥關關風飄花片空高下雨打鈴聲但往還  
掃逕祇容芟惡草獨留石上蘚苔斑

螢火

一點青螢斷續明虛堂冷意逼孤檠玉樓寒動清風袖  
銀海光搖不夜城恍似星精侵畫障忽疑鬼火照茶鐺

囊來曾助三更讀徒使車生浪得名

廣富林僧房小憩

小樓高敞一江風傍檻芙蓉映水紅松籟遠傳清磬外  
鳥聲遙唳綠楊中半鉤新月懸穹昊數點閒雲掩太空  
蚤挂蒲帆急歸去搏風輕舉若飛鴻

謙益堂中經年空鎖偶一啓戶見萱花盛開索酒

酬之喜而賦此

宜男小草弄芳姿冷淡生涯發幾枝耽樂不來曹植頌  
譏評亦少孟郊詩惟餘綠葉紛湖石只有丹花照酒卮  
樹背解憂雖戲語南窗一醉復何疑

咏茉莉花



幽芬引月不沾塵朶朶丰姿欲媚人半縷綵絲南越女  
一床清夢尹旋津好將佳茗消香雪更倩新螢點絳脣  
縱有冰肌誰得似愛他淺笑復輕顰

### 煮茶

甕甌汲得洗心泉鳳餅龍團著意煎活火烹來浮蟹眼  
沸湯騰上聳鳶肩初疑竹籟傳天半更怪松濤到枕邊  
傾得一尊同玉醴夜燈長伴小窗前

### 閒吟戲作數目詩

一條竹杖碧森森七尺藤床三尺琴雲暗誰知山萬仞  
浪高難測海千尋六經大畧糟和粕百世同歸性與心  
空笑十年樓不下五方原是有殊音

### 擇居

茫茫大化本無痕二氣流行若有根日月去人忙似箭  
風雷挾雨黑如盆雲籠幾點山常暗潮長三江水半渾  
何處好爲耕讀地平原前後擇孤邨

### 迷渡

青燐隱隱粟寒肌三老長年漸不支一葦衝波迷故道  
片時鼓棹昧前知狂風高捲叅差浪急雨斜侵寂寞祠  
直待雲開見明月變遷陵谷識殘碑

### 孤篷夜雨

一棹飛來渡石塘黑雲重疊轉蒼茫迅雷挾電豐隆鬧  
急雨迎風石燕忙對岸人聲倚檻聽傍林漁火隔江望



秦松莫道今宵苦明日天晴任爾狂

閒步容膝齋

閒房半月少經過忽訝空庭滿碧莎生意愛渠方漸長  
芳心與我孰爲多石坡有隙蜂爲穴桂樹無塵鳥作窠  
拂拭明窗凭曲檻小山新綠蔭嗟哦

一夢

衡門無恙樂清貧魚自天機鳥自親得失應知原在我  
榮枯何事可求人閑關任意尋荒徑冷眼旁觀趁要津  
多少蘼華成一夢醒時空憶紫絲蓴

過泖湖

湖光沸日白於銀激岸滌波蕩漾頻耳畔棹歌來釣艇

眼前負未見耕民一帆直可凌霄漢雙槳如同擷藻蘋  
我老是鄉殊不俗道心清淨隔纖塵

清明日掃墓作

多病多愁實不堪僅逾九月卽投簪故鄉親友申江北  
先壠松楸泗水南交節正逢一百六歷旬經過二千三  
官涇橋上凝眸望疎竹脩修護草菴

對鏡

一生吾與我周旋對鏡相看益可憐能解愁懷同莞爾  
不嫌老態亦皤然衣冠共訝真優孟池草堪猜定惠連  
幾度問君君默默翻疑人世小游仙

宣妙講寺小憩



玉虹斜跨隱垂楊一逕深深到上方幾曲疎籬環小築  
數株高樹入殘陽燼沉古鼎幢幡冷燕補新泥藻荇香  
汲得清泉煮仙掌暮山靄靄欲昏黃

牡丹花前作

玉樓獨立一枝春帶笑含嚔別有神唯我靜觀忘寂寞  
有誰相賞出埃塵詩逢險韻難酬客酒遇醇醪易醉人  
簷馬數聲天近暮隔牆明月到花茵

除夕步陳潛人韻

鼉鼓聲中爆竹多老漁敢望化龍梭無聊那得嘉賓至  
不醉其如良夜何碩果僅存輸絳帳小梅新放試紅羅  
祭詩塚筆尋常事手按青萍幾度摩

元旦步陳潛人韻

修齋度歲有誰知啜茗焚香坐六時不飲酒來虛對客  
未開懷處少吟詩行藏自昔同浮泡得失如今似覆碁  
且喜膽瓶插新綠好風吹動萬年枝

過紫岡

和風吹暖散幽芳偶步南塘過紫岡試粉蝶衣春未半  
弄簧鶯舌日初長綠圍僧舍纔通徑花放隣家乍出牆  
到老方知世外樂廿年枉自踏名場

登小赤嶺

獨登赤嶺俯春田滿眼蘼花草色鮮鶯囀千山日欲暮  
鶴歸一柱柳翻燼只今家食憑他誚自古官方有幾傳



身似晚風乘野馬任人呼拙亦呼顛

咏日本山茶

巨艦高帆泛海東素甌移植小庭中淡如碧玉千層雪  
豔比丹山一片紅爛熳三春欺國色迷離五彩奪天工  
寶珠自古稱難得今日相看愛不同

曉晴

淡雲籠日日初晴零落楊花尙有情薇放疎籬疑鬪錦  
鶯啼深樹若調笙採桑結伴攜筐女刈麥呼朋戴笠氓  
眼見耳聞成獨樂楓溪南去蚤潮平

月夜

輕舟傍晚泊江臯觸破浮萍刺半篙夜景有誰能領畧

天光許我獨游翱石梁穿月瓊樓滿畫閣懸風玉鐸高  
莫打殘鐘報岑寂老漁鼓浪起松濤

曉起

昨宵漁艇泛雙罾倦起登臨興轉增冷露逼人寒怯怯  
曉霞烘日熱騰騰暖風似飲能教醉鳥跡如書未解騰  
笑我鬢毛全白盡尙誇不要一枝藤

求仙

日月循環寂耐看雙丸跳擲自盤桓榴花謝後金烏瘦  
桂子飄殘玉兔寒此際可憐小結果當初原望大還丹  
蓬山到底無多路弱水三千跨不難

泛舟渡斜塘



空明子詩集卷之八  
扁舟迅水渡斜塘節屆清和麥漸黃蚯蚓出時忙耒耜  
螻蛄鳴後憲蠶桑牛來陌上依芳艸蝶宿花間戀暗香  
兒子不知炎景好野田但詫狗顛狂

同兆熊禮永清菴大士

嫩篁解籜護禪房特禮金仙午漏長合殿諸天忘色相  
半庭新綠間青黃尋僧蒙設伊蒲饌握管難追草屣狂  
點點慧心應不昧未知果否出西方

夜泊沔西永清菴側

雷光閃閃明西北忽有風雷來自南新柳倒垂如剪水  
老魚驚起欲翻潭砲車雲名亂滾盈千萬石燕狂飛至再  
三夜泊不寧心膽怯曉鐘清梵出茅菴

武塘懷舊

風景晴和麥正秋武塘簫鼓足夷猶交親忽爾俱黃土  
老子頽然竟白頭回首廿年成別恨懷人此日動閒愁  
呼兒且罄尊中酒新月當窗夜色幽

過嘉興南湖

萬家煙火屬嘉禾夜靜無聲聽棹歌高樹弄風寒少女  
荒江沉月冷嫦娥塔燈望去猶嫌少漁艇迓來不厭多  
幾度戍樓喧鼓角女牆崩處鎖藤蘿

禮法相寺定光佛化身

和雨和風到虎林定光古佛遠相尋廿年瞻禮常通夢  
一點精誠直至今竹閣尙留名士筆伊蒲重費老僧心



空明子詩集卷之八  
九  
筓輿歷遍崎嶇路新綠菁菁天乍陰

雲林寺訪諦和尚至已化去詩以悼之

雲林擬扣遠公禪不惜籃輿到寺前  
泉冷有亭看咽石鶴閒無主欲冲天  
一龕自在香風好七佛相傳花雨妍  
何忍忽忽便歸去繞山吟眺一潸然

玉泉寺池中五色魚盜去一空作此致慨

玉泉寂寂冷荒烟今日重過又十年  
寺毀僅存門兩片僧饑恰似柳三眠  
可憐不見飛雲履安望能來布地錢  
幾個老魚留不得方池只許照青天

重問西湖

榜人競報蚤霞生擊鼓鳴鑼次第行  
桂楫乍搖風漸疾布帆纔挂浪初平  
蓼花着露如新沐弱柳縈煙似宿醒  
正擬西湖看西子葛仙坡下結初盟

孤山弔林和靖

西泠橋畔見孤山四面環湖雲水閒  
幾輩逃名耽鶴夢何人愛屐踏苔斑  
臨流草護鱗岫石對雪梅開深淺灣  
南渡諸公誰得似逋仙一塚鎖松關

拜岳武穆墓

金牌十二詔班師天厄孤忠運可知  
誰秉國均何夢夢不爭鷄口竟靡靡  
生前寂寞埋冤獄事後巍峩賜特祠  
一片丹心留墓木至今猶有向南枝

拜于忠肅墓



空明子言集卷之八  
錦塘西去望三台特訪孤臣墓上來一代存亡真有係  
百年生歿莫須哀只今共仰山頭土在晉曾推天下才  
廟貌聿新同武穆雙忠千古出塵埃

上天竺寄慨

紛紛競語五年前寶座慈容幸宛然殿宇竟罹三昧劫  
亭臺總變一爐煙可憐金粟原靈感無奈沙彌多罪愆  
非吝楊枝幾滴水會須燒盡野狐禪

飛來峰

飛來峰下好探幽三十年前憶勝遊泉尚有聲依舊冷  
山仍不去爲誰留線天隱隱明還暗石洞深深暑亦秋  
非向此間求出世擬於何地覓靈脩

白沙泉

輿人競報白沙泉清潔甘香出自然僧侶不聞來卓錫  
詩翁空嘆度流年但餘松韻調琴瑟亦有鶯聲奏管絃  
安得月明尋片石飽嘗玉醴任高眠

城隍山寄眺

半山宮殿對江開喬木參天蔭綠槐象外煙波連海嶠  
望中城郭接樓臺香飄金鼎隨風散旗捲黃埃動地來  
下土直從高處照威靈赫赫豈容猜

望錢塘江

朱衣白馬涉江來滾滾潮頭動地迴雪浪打翻羅刹石  
銀濤衝突定山堆神靈尙有亡吳恨蠡種羞稱霸越才



自古盛衰關氣數會稽不久亦蒿萊  
吳山俯視海潮寬極目錢唐興未闌  
隔岸高峰皆越地傍橋深洞屬仙壇  
就中易覓逋仙墓世外難求野鶴丹  
脫帽偶談南渡事紫霞西望碧巒岈  
浴佛日過南屏淨慈寺  
散步南屏破蘚斑紛紛梵唱似魚山  
佛衣虛設誰傳法慧劍空談善斬關  
鐘鼓有樓宮殿古松筠環寺歲時閒  
當門一柱雷峰塔遙映漁舟幾度還

湖心亭

一亭高覆綠陰陰西子顰眉似捧心  
明鏡催妝勻膩粉翠屏鋪繡覆華衾  
風迴十錦漁朝唱月印三潭鬼夜吟  
遙想六橋花放日畫船簫鼓玉人臨

蠶事嘆

草橋流水占斜陽陌上栽成百本桑  
枝嫩摘來行小徑葉柔飼去帶餘香  
絲絲待爾充官稅歲歲將渠助客裝  
堪嘆甌塵依舊滿祇留蠶種付空箱

謝村道中

隴頭斜日下牛羊桑葉芟完農正忙  
拂岸自憐花影動過窗頻覺草根香  
石塘築後容車馬水道通時利客商  
我本飄然塵世外往來似屬冶遊郎  
重過鴛湖自角里街步至朱買臣墓



輕橈鼓盪綠波煙重過鴛湖入暝天百雉藤蘿牽竹木  
萬家燈火映樓船買臣遺骨知何在角里名街有幾年  
且與兆熊同步月招提一探問空禪

有悟

一江風定絕波紋徹底澄清度夕昕楊柳任他縈荇帶  
鷺鷥隨意入鷗羣煙霞過去渾無迹日月行來不見雲  
止水管人曾喻及那容點點雜天君

獨坐振秀堂

閒窗盡日理芸編小炷名香一縷煙補壘燕泥污筆格  
拂塵塵尾動琴絃梅因凍雨枝尤傲桃待溫風子漸圓  
湖石幾堆通雪洞滿山苔蘚紫藤穿

蘇松兩郡浮糧雍正三年春奉 特恩減四十五

萬兩著爲定例萬民遍德作此以志慶幸

八十餘年望好音故明遺累到如今屢捐久被憚蒙澤  
特減尤欽宵旰心婦子家家歌浩蕩兒孫世世感高  
深莫安磐石超千古 德意欣看勝雨金

新燕

呢喃並語曲欄邊解向雕梁借一椽意緒恰同尋逆旅  
心情似欲訴流年寒深未放泥香潤風急偏容柳態顛  
好待日晴春色麗穿簾剪水落花前

軟語相商小閣邊來回意欲寄華椽巢林無主悲當日  
棲幕依人憶去年愛逐蜂忙兼蝶亂怕逢雨困更風顛



春潮正長芹泥潤莫憚綢繆結綜前  
新燕差池畫閣邊初成毛羽託脩椽殷勤築室消長日  
辛苦銜泥度小年側注斜飛摹草聖臨池醉墨學張顛  
呢喃莫憶烏衣巷且伴流鶯過眼前

喜得異種洋茶一本幽香殊絕花如楊妃吐舌之  
狀故作此詩

爛熳洋茶惜欠香獨驚此本散幽芳幾經炎海來松蘿  
何意春風到艸堂粉面絳唇紅一點玉環珠淚雨千行  
相將莫漫輕拋擲待月西偏理淡妝

春寒苦雨

一庭新綠遲

音雅

芳苔花勒餘香那肯開節序共疑春未

到兒童爭訝燕還來林逋覓句殊難穩崔護題門正費  
猜鬢髮爲誰全白盡淒風苦雨暗相催

寒食日作

淡煙疎雨濕蒼苔海燕銜泥幾度來寒食乍逢春漸去  
袂衣初試冷重回風教柳葉遲遲放霜約桃花緩緩開  
好向晚山聽睨睨雙柑斗酒踏崔嵬

舟中掃墓作

沈涇東去接通波獨把魚竿寄嘯歌新笋出牆兒鬪得  
好花落地鳥銜過蹉跎歲月嗟如此辜負身名奈若何  
罔極恩深慚莫報空令喬木鎖煙蘿

登一覽樓步夏元吉先生韻



危樓鐘鼓動空山結伴同登春未闌南浦淼茫搖積素  
東風料峭鬪輕寒影留共仰觀音石鰻失誰窺古井瀾  
極目海天看不厭綠陰初盛杏初殘  
策杖躋攀第一山佛樓面面鎖雕闌杏花樹老僧房靜  
瑞像光沉石碣寒翠色拂空松有韻晴波弄影泖生瀾  
夜深乘興邀明月遙聽城頭更鼓殘  
澹日遙銜九點山登樓寄眺倚危闌井鰻光暗香煙冷  
海鶴聲沉竹木寒紅杏樹頭花作陣綠漪堂畔水生瀾  
夕陽弄影穿窗角春色欣看尙未殘

靜觀

碧天無際暮山橫草綠長亭一片平金勒不驚麥浪大  
粉衣偏愛柳風輕爲聽松韻消塵念因見楊花淡弄情  
物我兩忘機械絕何須更與鷺鷥盟

賦得鶯到垂楊不惜聲

綠楊揮帚散晴煙公子來遊樂事偏金縷合吹三弄笛  
艷聲勝撥四條絃如思捐蝶春風裏似憶投梭紅樹邊  
好趁韶光聽百轉莫教辜負落花前

即景

午漏初交日乍晴忽聽鶯舌欠分明海棠帶濕胭脂重  
楊柳經風碧玉輕已結新知常滿座難忘舊雨似浮萍  
呼兒爲我尋鳩杖閒步春田看耦耕

獨坐



鴨鑪香煖日初溫寂寂無人獨掩門文字有禪誰復解  
性天妙諦莫能捫花枝搖曳窗前景燕語呢喃簾外喧  
不問升沉榮辱事一編聊與對清尊

賦得春歸人未歸

新燕啣泥補舊窠紛紛蜂亂蝶忙過繁花漸落飄紅雨  
弱柳輕翻湧綠波獨惜韶光同夢短可憐鬢髮點霜多  
陌頭幾度看春色柔蔓無依嘆女蘿

泛舟泖濱訪八十壽翁汪處士

閒鷗立斷一溪煙處士門前景倍妍綠柳緊搓縫襪線  
白榆忙辦買山錢蝶飛花外耽春夢犬吠林中醒晝眠  
借問脩齡今幾許渭濱遺老釣璜年

五君詠

五君者趙柳介陳含美李節珊朱秉士及練川  
張樸邨一生交好志同道合不意二十年中俱  
已化爲異物經黃公之酒壚念山陽之故里能  
不悲哉故有是作

失卻羲皇以上人可憐金石嘆沉淪菊開每憶重陽酒  
風動常懷一座春不愛王楊工富麗獨標陶謝見精神  
琳琅滿匣誰收得莫使鴻文付暗塵

趙君

霸才誰復念文雄自號高陽一醉翁半世虛名空冀北  
三間茅屋老牆東首邱得遂依先壟手澤徒憐付冥鴻  
若個金蘭稱莫逆對床風雨燭搖紅

陳君



十年不見謫仙才澤畔行吟步綠苔落落故人惟我在  
荒荒孤塚有誰來垂楊滾雪風逾厲獨鶴盤雲日漸頽  
何處山陽堪復問敗牆瓦礫沒蒿萊 李君

小橋流水浸枯楊竹舍青青話夕陽新釀一尊曾共醉

故交三世豈能忘珠沉玉碎琉璃脆風捲雲飛日月忙

惆悵酒壚興嘆後半窗花落淚沾裳 朱君

地隔吳淞一水長望雲懷想鄭公鄉香名共仰人如玉

素行爭推道自光學本程朱叅性命才同潘陸賦汪洋

懸知馬鬣封成後惟有悲風戀白楊 張君

弔王玠右先生

先生同令弟名世時人比之機雲易代後借隱海濱

躬耕隴畝志千秋靜鎖衡門謝勝流豈羨故人天上去

不令難弟畚中游吁嗟墓木今成拱惆悵文名屬贅疣

識破大千俱是幻須彌月影過闔浮

弔吳日干先生

逃名無策嘆蹉跎且向煙霞臥薜蘿天上神仙海上遇

雲中雞犬月中過北邙誰念埋青草南浦遙憐泛綠波

今日蓋棺方論定生前原是老維摩 一生僧帽故云

憶潘洛符先生

先生順治辛丑罷官康熙戊午重入泮已未食廩下場三次而卒

猶記兒時把袂牽先生道貌睹爭先講堂撤後衣冠敝

故里歸來襪履穿筆有珠璣驚燦若胸無矛戟樂陶然

大鵬重奮冲天志倦翮雙垂近十年墨寶盡留賢壽曾

弔朱萼江先生

先生



覽輝高閣憶同登  
惠我春風勝百朋  
啓後典型堪接武  
承先文采足傳燈  
瓊枝埋沒情難已  
墨寶遺留價倍增  
寂寞一杯封宿草  
西山空對石稜稜

挽漢瞻大兄

諱雲章

樂道忘年過此生  
羣瞻處士一星明  
養親在昔推純孝  
問字於今失老成  
幸有鳳毛堪濟美  
欣看雁序尚爭鳴  
從來五福稱難備  
獨慶先生享令名

悼岑遙青

繁華閱遍帝京春  
幾度朱門醉錦茵  
妙舞漫看金線柳  
清歌欲拂畫梁塵  
釀從麴部羞三雅  
饌出郇厨陋八珍  
殘月曉星容易滅  
青燐一點照江濱

憶酒顛王子

夜半題詩憶酒顛  
酒顛曾與漫周旋  
五行叅破陰陽理  
一斗鎔成渾噩天  
荒壠蕭蕭涵夕照  
故居寂寂鎖寒煙  
象賢習得君平術  
賣卜成都又廿年

北郭嘆

往時曾醉夕陽紅  
婪尾春深酒不空  
別院無人搖竹木  
隔牆有女弄絲桐  
鶯啼似怕催花雨  
蝶舞偏憎擘柳風  
一自故交星散後  
草亭誰復見賓鴻

弔俞陳芳廣文

先生家於泰州秉鐸華亭卒於官署扶柩回籍已近十年詩以志感

文星隕後鱣堂冷  
絳帳虛懸鳳不來  
讀易精微叅易簡  
吟詩潔淨絕氛埃  
可憐埋玉悲荒塚  
猶記留琴痛劫灰



一別海陵千古恨夕陽惟聽笛聲哀  
四星弔金德籓廣文

高陽嫡派在於斯醉裏狂吟世共知  
罵座每遭惡少毆  
論交常與老成期生前薄宦如駒影  
死後微名付犍椎  
羣仰文明高百尺曉星明滅不多時

犍居偃切

得盛悔亭凶問

寄食天涯作散人每逢詩酒獨傷神  
不交春夏秋冬運  
剩有東西南北身鄉國那堪回首望  
友朋難得白頭新  
知他旅櫬歸何處魂斷蕭蕭易水濱

老猿

曾向幽巖物外游老猿覓菓樹梢頭  
山人去後驚猶小

楚國亡來禍不休  
月報時何所恨  
投林守火總堪羞  
可憐三峽三聲歇  
誰復聞聲淚欲流

惡鳥

林臯攜杖正尋春  
片羽飛來欲搏人  
聲似訓狐還更惡  
毒如運日轉難親  
嘔心至死同長吉  
貪飲忘生類伯倫  
月落西邨風寂寂  
夜深鬼火哭江濱

洞玄君

中流容與著玄衣  
長守靈蓍那療饑  
放處回頭忘報德  
攻時鑽骨聽研幾  
搯牀廿載身常困  
曳尾千年願不違  
一自九江來震澤  
石龕高臥伴漁磯

指迷



空明子詩集卷之八  
六  
芙蕖映月迥無倫淡寫胭脂滿地春茗椀飄香輕似夢  
獸鑪餘燼細如塵須知四大非真我要辨三生亦別人  
方寸靈臺能識得去來何必問前因

贈太倉王貞女

貞女係太倉少司農王公諱原祁孫女孝廉公  
諱諤之女不幸父母蚤亡祖父司農公見其讀  
書知禮尤憐而愛之許字舍妹丈葉司直之第  
二子志學字仲傳爲室及笄志學因攻苦病弱  
而卒貞女聞而不食者旬日家人再四勸之而  
稍止即矢志柏舟雖衆口曉曉無以易其初念  
也在家守貞者已十有三年今戊申季春司直

妹丈迎歸守節予嘉其志作此表之

一聲哀慟徹窮泉貞女來歸義薄天愁緒難拋千萬縷  
麻衣已著十三年未亡節比青松勁之歎心同白璧堅  
闕闕門庭尤僅見柏舟矢志幾人傳

上巳前一日泛舟八曲經過簾山有作

鶯花得意日初晴蚤挂蒲帆逐浪輕曲水溶溶流上巳

簾山濯濯誤佳名

府志云山產美箭竹今則爲童山矣

白鷗傍岸眠芳草

黃犬沿邨出惡聲堪嘆故交零落盡登臨何處好同行

泊舟薛澱湖中

甫里相違魂夢牽澱湖風景尚依然漁舟網集青山外  
牧笛聲傳綠水邊鬚鬢漸衰歸暮景鳶魚隨分度流年



凭窗四望閒吟咏一鶴橫空入曉煙

游奕山弟園亭有贈

環溪嫩雨浴桃花修竹遮門寂不譁  
犬吠落紅驚燕剪鶯梭垂柳觸蜂衙  
一團活火烹新茗半縷清香誦法華  
身世兩忘歸太朴尚防言語帶煙霞

誕日即景用工部人生七十古來稀爲首句

人生七十古來稀笑我無成老布衣  
浪說文章空自媿侈談經濟亦多違  
穿花舊愛黃鸝轉帖地新看粉蝶飛  
滿目煙波數聲笛漁舟網得鱖魚肥

諸子贈言

自丙申至己亥歲投贈紛紛琳琅觸目  
諸體畢備美不勝舉欲全付梓力有未逮  
束之高閣心又難安謹先略錄七律數篇  
鐫之梨棗用酬雅愛

讀空明集賦贈

景翁年長兄先生即求教定

著書開徑待羊求鼓吹真堪號素侯  
絲竹東山推雋永樽壘北海繼風流  
雲生紙上蛟龍舞思入毫端風雨愁  
誰識此中無限意特嚴筆削續春秋

雲間八十四翁同學教弟顧之珩拜草

讀空明集賦贈



景翁年長兄先生并請教正

司香曾侍紫宸居  
謫下人間爲著書  
墨灑金壺胸是錦  
筆髡玉兔歲成墟  
蒙莊夢到遊仙適  
曼倩文傳罵鬼餘  
老去惟耽黃妳伴  
空明一卷樂何如

古婁八十一翁同學小弟姚弘啓拜草

里句奉送

空明先生之任崇川并祈教正

葵榴五月照江城  
外翰仙舟羨此行  
海國爭看開馬帳  
文壇誰不仰鴻名  
錦帆映日兼雲遠  
青雀凌風逐浪輕  
莫爲尊鱸歸興切  
鋒車只恐促承明

茸城八十一翁同學教弟陳言章拜草

里言奉贈

景翁老先生大詞伯并希郢政

聖門觀海受朝宗  
不薄儒官起臥龍  
國士氣衝清電影  
書城秀比紫霞峰  
鳳鸞儀表輝霄漢  
牛斗光華洞眼胸  
竟作神仙洲島坐  
何須食祿美千鍾

谷水七十四翁同學小弟潘鍾麟拜草

里言奉贈

景翁老先生并求教政

露桃遮屋水環門  
通隱林泉道自尊  
千首詩中忘物我  
一枝棲外任乾坤  
偶成夢蝶花龕暖  
靜數遊鱗錦石溫  
見說清流時滿座  
每燒紅燭醉平原



空明子集賦贈  
武林後學張琳拜草

讀空明集賦贈

景翁老先生并求教正

跂望龍門高百尺登堂半豹未能窺天高但訝形寥廓  
海濶徒驚勢渺瀰繞座桂香簾外月滿庭草綠意中詩  
縕袍倘不先生棄可許雲亭更問奇

天都後學晚生黃煒拜草

里句奉呈

空明先生并祈斧政

才名籍籍曲江頭捧檄新從海外遊風度早懸孺子榻  
月明深愧仲宣樓朝吟首蓓推三絕秋斲參苓傲五侯  
不爲年來叨世講何緣車馬得攀留

古瀛同學弟鈕滄拜草

里言奉贈

空明老先生并祈斧政

聖人界上聖人生

即用續集雜錄中聖人界上語

脉接尼山空又明不

與庸夫同富貴寧隨俗吏共功名出遊上國揚帆送入  
寄孤城擁篲迎洙泗心源流澤遠斐然狂簡受裁成  
東洲晚弟施瀛選拜草

里詠奉呈

空明先生老年伯斧政

才名直與斗山高詩酒縱橫曠代豪跡似泛槎乘逸興



情同思膾薄閒曹晚年獨愛淵明菊夙世曾嘗曼倩桃  
文舉通家真忝竊不辭疎野漫揮毫

年眷姪施晉秀拜草

讀大集賦呈

空明老表叔先生并求教正

文壇詩社宿稱雄亮節高標孰與同笑看兔烏如碾磨  
不隨牛馬類旋蓬潮逢海漲溝渠潤花待陽回爛熳烘  
三絕韋編看不足還當日日坐春風

滄瀆表姪王澄拜草

里言奉呈

景翁太老先生并祈斧正

一瓊聊復試澄清戶外生徒早遠迎自昔文章驚海內  
從今吾道快東行師門坐納朝宗水闔邑環聽木鐸聲  
莫道廣文官太冷由來此席重專城

浦南晚生凌顧榮拜草

里句奉贈

空明先生即求誨削

乞得珠編手自持一朝頓慰十年思連天人共推張姓  
度日儂偏愛六詩待濯薔薇方受讀擬裝璜瑁為題詞  
春風簾外花如錦應讓毫端染色絲

西村小姪范仁霑拜草

里言奉呈



叔父空明先生斧政

秉鐸由來簡大賢  
葵榴照眼送行船  
文章自昔驚風雨  
教澤於今遍海天  
蘭桂盈庭綿祖德  
詩書覺世接心傳  
遙知到日從遊滿  
萬丈文光星斗連

清溪姪京鑑拜草

里言奉呈

景翁老伯老先生并求斧政

先生雅志托林泉  
著就奇書世共傳  
松徑養成千歲鶴  
硯臺吟老一池煙  
初攜講席當春暮  
却喜談文到海邊  
此去扁舟維夜月  
落花飛絮點青氈

谷陽小姪夏廷琮拜草

里句奉送

空明先生老年伯之任崇川天風海濤極宇內之奇  
觀其詩歌古文必更有超出尋常萬萬者因用東  
坡過海詩茲遊奇絕冠平生為起句以贈之

茲遊奇絕冠平生  
不是餘年起宦情  
世路何曾停濁滓  
予懷本自愛澄清  
盡刪江左鶯花句  
去振天涯木鐸聲  
論語壁經勞點注  
休云恬靜泊無營

海陵年眷姪俞楷拜草

里言奉贈

空明老先生并祈斧政  
早厭繁華欲立言  
晚來閉戶枕書眠  
宏詞未赴遲蘇轍



博學多聞羨茂先賦就五茸誇不日註成羣籍豈經年  
曠懷自抱胸中富聲望那因鐘鼎傳

雲窩八十老人同學教弟汪俊拜草

戊戌長夏奉讀

空明先生全集喜而賦贈并求 郢削

已知雅掾從無匹始信傳文自有真陸海潘江猶退避  
郊寒島瘦復何論行間斷續痕俱化筆底波瀾意獨新  
聞道玉皇文案吏此身原是謫仙人

申江樵叟教小弟金爲楫拜草

里句奉呈

空明先生并求 教政

一金篇什雞林重廿載聲名學者師笑罵文章關世教  
表揚幽隱足風姿帳中本自家家秘架上籤期得得時  
肯惜全編遺野老花間浣手讀清詞

古浦七十六翁教弟馮祝拜草

里言奉送

空明先生之任崇川并祈斧政

高樹濃陰日正長徵書忽下趣行裝安車莫慮山川阻  
化雨應培桃李芳禮樂百年看漸盛文章千載有餘光  
不須片刻春風滿瑞協鱣堂動 帝鄉

苧城同學教弟姚詮拜草

里言奉呈



空明老先生年伯 教政

自知愚昧愧憧憧得讀鴻編識所宗  
諦論固多闡聖教  
寓言總欲挽頽風  
詩兼李杜才逾大  
文似蘇韓氣更雄  
觸目頭頭都是道  
頓開茅塞藉陶鎔

嘉定年春世姪李炳拜草

里言奉呈

空明老先生并求 教政

手戀珠編日夜擎  
文家百體製都精  
閎中似海誠難測  
迅筆如雷劇可驚  
繡虎雕龍充藝苑  
琪花瑤草滿詩城  
才高自合來流輩  
低首雄師作步兵

笏水晚生陳璜拜草

讀空明集恭賦一律呈

空明先生老叔翁笑正

簪纓門第久輝煌  
嶽降名賢姓氏香  
一代文章超兩漢  
千篇吟咏軼三唐  
羣推獨行培基厚  
共慶雙珠貽澤長  
曾侍東山修禊日  
幾回曲水泛霞觴

華亭姪壻宋延樸拜草

蓉江旅次賦呈

崇沙夫子即祈教政

蓋代名賢傾蓋逢  
高懷壁立許誰蹤  
雲翔千仞輝如鳳  
電擊重溟氣似龍  
四海論文無左席  
一朝捧杖得先容  
亦知大冶無凡礦  
何日追陪共夕春



長洲門人朱奕恂百拜草

里言奉呈

空明老夫子誨定

二陸風流未足誇潛心味道謝聲華一塵不染胸中鏡  
萬卷都融舌底花桃李滿園滋雨露芝蘭繞座發萌芽  
管窺蠡測知無當海濶天空豈有涯

鹿城受業門人唐奕琦百拜草

里言賦呈

空明老夫子斧政

文星下降古瀛東洙泗於今一水通講道理探濂洛秘  
談文光射斗牛宮鱣堂環擁春風暖絳帳宏開化日紅

幸得豨苓蒙不棄也同參朮貯籠中

崇川門人宋斗山百拜草

里言賦呈

空明老夫子教政

七葉金貂莫與京雲間鳧鳥下東瀛文章海上今坡老  
制策江都舊董生席坦片瓊清夢穩堂虛半壁野禽爭  
厭居富貴神仙府來築蕭疎桃李城

長沙門人劉萃乾百拜草

恭賦一律奉呈

空明老夫子斧政

巍峩甲第冠雲間麗藻雄文孰可攀戀別林泉常鎖恨



喜培桃李藉開顏盈懷化雨琴初潤滿座春風花未殷  
自愧樗材蒙拂拭欣陪講幄近尼山

瀛海受業門人倪華勳百拜草

里言奉呈

空明老夫子斧削

橫渠夫子綫猶存自愧菲材也在門苦海幸來新大士  
後堂許侍舊王孫斯文山斗名千古問字風流酒一尊  
不遇先生頻說項薦雄文似有誰論

東沙門人郭治百拜草

里言賦呈

空明叔父老夫子斧政

廿年疏水樂衡門天老竒才道自尊萬卷詩書窮本末  
一堂師友接淵源雲仍舊誼風真古桃李新栽日更暄  
蒙賜瑤編忙盥讀西銘能許侍同論

三沙受業姪國鼎百拜草

里言奉呈

空明老夫子斧政

燕國才名山斗懸百年門第珥貂蟬卜居舊買陸雲宅  
秉鐸新開安定筵桃李千村含雨露管絃百里荷陶甄  
鶴書早晚來關右伯起堂前報落鱣

崇海門人施卓立百拜草

恭讀



空明老夫子集才情雄壯軒古輕今殆所謂玉振金聲集詩之大成者賦此一律以深仰止

笑傲乾坤一散仙品題風月韻悠然筆花點點飛香雪墨浪層層湧碧天海外於今來白傳雲間久已識青蓮直追漢魏高千古三百遺編應共傳

姑蘇門人宋渤百拜草

里句奉呈

空明老夫子并求斧政

忘分周旋講易堂瑤章滿目觸琳琅退閒自謂先生癖進取能容小子狂靜若枯禪忘色相溫如美玉婉圭璋生申共喜逢修禊好借流觴作壽觴

上巳日係夫子生辰故云

西洲門人黃鶴山百拜草

里句恭呈

空明老夫子誨定

蓬萊海上泛仙槎譜牒從來赤鯁誇十乘朱輪皆玉筍一門紫氣集京華文章溥作瀾天澤桃李弘栽滿苑花今日登龍欣有托幾忘蹇劣在泥沙

東海受業門人倪藩百拜草

讀空明集恭賦一律呈

叔父空明先生斧削

滄溟遠望無涯白齊魯遙瞻未了青獨斷撰來傳信史支談刊就續元經常看謝眺吟茵閣時聽湘靈鼓洞庭



萬丈光芒遮不得  
干將搖動出新硯

姪煜百拜草

讀空明集恭賦一律呈

叔父空明先生斧政

潛心鑄史及鎔經  
几案親承示典刑  
百卷不過龍片甲  
萬言亦屬鳳遺翎  
花梢待月燈初暗  
風脚穿簾酒半醒  
幾度仰干星斗象  
遙天雲霧杳冥冥

姪煜百拜草



